

204.3.4.5

Let

TR.

VIT. EMAN. II

4  
A

NAZ. CENTR.

R. BIBLIOTECA

204

3 A

5

ROMA

VITT. EMAN. II

204.3 A.5



STEPHANI  
PETIOT

SOCIET. JESU.

PANEGYRICI DUO

ALTER

DE RUPELLA

expugnata .

ALTER

DE DELPHINO.



ROMÆ, 1698.

Typis Antonii de Rubeis  
in via Vitis.

Sumptibus Matthæi Fumerè  
Bibliopolæ in foro Agonali  
sub signo D. Thomæ  
Aquinatis.

*Superiorum permissu.*




1. Introduction

1. *Phragmites* (common in the marshes of the lower Mississippi River and in the coastal marshes of the Gulf of Mexico).

1997

... ..

1. *Chlorophyll a* (Chl *a*)



# PANEGYRICUS

LUDOVICO XIII.

DICTUS.



Attingisti gloriæ verticem, REX INVICTISSIME, adæpta es votorum summam, fortunatissima Gallia; tenes fastigium dignitatis, Christiana Religio; Bellum illud aliquando confestim, ad quod unum toto sæculo communia omnium vota, privata singulorum studia, publica comitiorum consulta, sacrorum augusta solemnia, Regum expeditiones innumerae, multorum terra, marique contentio præliorum, belli, pacisque quotidiana consilia, Reipublicæ demum totius rationes, motus, sensus universi referebantur; ne

quis possit ambigere, quin hoc unò  
eardine fortuna civium, fors Gal-  
liæ, majestas imperii niteretur.  
Habet superbia suos gradus: ad  
extremum devolvitur, postquam per-  
venit ad primum; qui non novit  
ultrà crescere, ruere cœpit, nihilquē  
tām propinquum est casui, quàm  
quod est summum: Cœlum ipsum,  
quo nihil altius occurrit aspectui,  
fatum expectat; & momento sæ-  
pissimè perit, quodd ægrè sæculum  
peperit. Sic illa jacent tot annis su-  
data perduellium propugnacula;  
dissipatæ sunt ingentes illæ Britan-  
norum classes, utrorumque junctæ  
cum extrema rerum desperatione  
incredibilis audacia corruit; terræ,  
maria, tempestates succubuerunt for-  
titudini regiæ: locis demùm univer-  
sis profligata Rebellio, simul omnia  
sibi sensit præter inferos esse con-  
clusa. Quæ immensitas gloriæ, na-  
turam totam unius triumphî pom-  
pa traducere, utque pauci homi-  
nes parere discerent, elementis  
omnibus imperare! Quod si adhuc  
aliquis ex illa furiosorum hominum  
turba, qui humanæ fidei desertores  
sensim à divina deficiunt, de æter-  
nitatē



*Ludovico XIII.*

nitate hujus imperii dubitavit, fateatur errorem suum hodie, postquam illud videt perduellionis ruinis impositum, felicique commutatione fatorum, à REGE LUDOVICO, immortalitatem regni, nominisque Gallici confirmatam, ex quo hæreticus desertor occubuit. Cui enim Cælum aut lubentiùs laboret, aut gloriosius, quam ei Principi, qui Numinis hostes evertit? Quem alium coronet ambitu sæculorum, & temporum, quam eum, à quo tot laureis coronatur? Delubris eos coluit antiquitas, qui istis minora fecissent, & pro Diis habitati sunt apud suos, qui tecum, REX FORTISSIME, comparati, vix homines viderentur. Quot tu ergo fana, si vixisses illis temporibus, neque te ad fœlicitatem nostram fata servassent, quas ædes, que Numine consecrasses? Quam Religionem populis attulisses? Non cives, ut aliorum solebant, sic tuum funus expectassent, tempus illud sacrificiis occupassent, ipse vivus habitasses in templis, auxisses orbis cœremonias, & aris impositus, quibus auribus nostris nunc perci-

pis, eisdem omnium vota gentium accepisses. Verum tu, qui solidis abundas laudibus, hac inani superstitione non indiges. Non crescit mendacio veritas; ad superos vita, non fama nos evehit. Tuis maiores incrementis, quam fictæ religionis encomiis; majoris sublimi demissione majestatem tuam extollere, quam abjecta superbia, & sordido fastu deprimere. Gaudes conscientiae bonis, nullaque præterea re, quam virtute, vis cæteris eminere mortalibus; adeoque divina cum facias, humanam sortem non erubescis. Faceflat ergo vana hæc species religionis, verat ipsa religio regis laudes sacrilegio prosequi; quam sunt illa deformia, quæ crimine calamistrantur; virtus virtute laudatur, nunquam consecratur à vitio. Votis publicis oratores alii suorum principum facta commendent, faciam ego, ut intelligant universi, te tuis factis, **REX AUGUSTISSIME**, vota mortalium superasse; & si vota universorum, quanto magis mea unius præconia superasti? quicquid tamen de te dixerimus, dictum erit magnificè, quia

quia nihil fecisti humiliter , & demissè ; toties amplissimè laudaberis , quoties verè , quæ gesseris narrabuntur : rursusque toties vera de te audies prædicari , quoties recitabuntur amplissima. Ornasti tu facta ; corrumpet qui meliùs ornare voluerit . Mitto igitur esse sollicitum de cultu orationis , postquam tantus est splendor in ipsa materia . Narrabo sinè multo apparatu quos hoc bello hostium populos viceris ; quam rupem , quam Rupellam expugnaveris ; quas procellas , & maria fregeris . Sed adhuc necesse est scire , quòd dicendi initium , quem modum facere debeam : non quod laudes tuas , quæ sunt immensæ , credam ullis terminis definiri posse : sed nè infinita fiat oratio , si in proferendis tuis trophæis , velim ire per singula . Sequar igitur in scribendo ordinem agendi tuum , & cùm magnitudinem hostis , quem oppressisti , demonstravero ; tùm pugnae genus exponam , seriemque victoriæ .

Hostis erat vincendus ille , qui suopte ingenio semper elatus , nunc certè longo virium suarum usu , & fortitudinis experimento , supra mo-

dum tumidus , certior sibi semper de victoria , quàm de prælio videbatur . Erat communis omnium sensus , Rupellam temeritate , & audacia tentari posse : quæ hinc arduis quidem propugnaculis , fossa præcipiti , pendenti vallo , continuato aggere , lenta palude , molitione multiplici inclusa esset ; illinc verò latissimo , altissimoque freto munita , cui projectæ turres incumberent , & objicerentur portæ , transversis cratibus , horrenti ferro , armatis navibus , feralibus tormentis ; ineluctabili catena vallatæ : adeò multiplici carcere debuit , antequàm moreretur , includi rebellio ! quæ se virtute tueri non potuit , debuit machinis , & quæsitâ munitione defendere . Quot dementia vallis indiget ! seipsam innocentia sine custode tutatur ; impietas nullo arcium munimento secunda est . Mediis soluta Rupella vivebat in vinculis ; semper pavida , quia semper rea ; semper de præsidio sollicita , quia conscientia sceleris semper obsessa . Accedebat vis annonæ incredibilis , vini , frumentique numerus ingens , apparatus denique rerum omnium  
toto

toto sæculo meditatus . Nimirum omnia sibi necessaria timor putat . Prestò erat exercitus in Occitania , reliqui signo dato in castra venturi , palàm , & publicè dicebantur . Subsidiorum prætereà opportunitates innumeræ , robur Angliæ conjuratæ , præsidarius miles erat intrà mœnia receptus , ut pugnarent exteri , cives sinè periculo triumpharent . Non obscura erant jurata sociorum auxilia , & cæterorum hæreticorum variis locis factiones ; petebatur hæreseos caput , quisque manum objectabat . Procerum etiam quorundam , ut rumor tulit , enormes conjurationes celebrabantur , illius necessariae societatis tabulæ , perduelliumque sicariorum adscripta funesto catalogo nomina circumferebantur , confœderatorum dignitas ( si in proditiōe patriæ aliqua dignitas esse potest ) famam , nomenque sceleribus colligebat : quem deterrebat atrocitas facti , facientis autoritas invitabat . Immensas quasdam habet vires ad persuadendum nobilitas generis . Speciosa sunt crimina , quæ in purpura nutriuntur . Ad hæc infinitis bellorum sumptibus Regis

exhaustum erat ærarium, nobis tum classis nulla, quadriremes jampridem dimissæ, caritas annonæ hoc tempore summa, frugum interitus, urgens fames, grassantes morbi, pestis locis omnibus multa: malos premebamus, malis obruti: obsidebamus paucos, omnes obsessi: vix licebat vivere, & vincere volebamus. Augebat infinitè superbiam hostium longa belli experientia; quippe qui non solum olim sæpè, modò cum Anglis, modò cum Batavis, partim cum Hispanis, partim cum Lusitanis conflixissent: sed & nuper Regis classem tum Oceani, tum Mediterranei maris copiis instructissimam duobus præliis fortiter sustinuisent. Quis in tanto apparatu Rupellæ sensus? Eò devenerat impudentissima civitas, ut dudum cæteris gentibus cladis metum inferre, regum purpuram, leges, & oracula conculcare; Reipublicæ succum, & sanguinem exhaurire: cædes, & incendia circumjectis regionibus, & agris objicere; antiquas Drusiaci prælii, Dionysiaci, Iarnacensis, Moncontoriique tragædias renovare facile posset. Tantum erat in impudentia

dentia roboris, tantum virtutis in scelere ! Rupella reginam agebat imperare docta, quæ nunquam parere didicerat : administrabat omnia summa authoritate, cœtus provinciales indicebat, publica comitia convocabat, militem tum domesticum, tum externum conscribebat, provincias, præfecturasque dividebat, jus cudendæ monetæ sibi arrogabat, inurebat sigillo, ferebat edicta, imperabat pecunias, portoria exigebat, in omnia demum tyrannico dominatu invadebat, ut incertum videri posset, plusne Regi per authoritatem, an subdito per crimen, audaciamque liceret. Horrebat immaniter Rupes ista, celsaque fronte crescebat in dies, ut ponderosius rueret : periculis superbiam animabat, erigebatur denunciatione bellorum, vel ipsa sanguinis specie pascebatur ; de cinere videbatur illi triumphum, quicumque prælium indicebat ; majorque persuasione quàm robore nunquam cessabat ab injuria, nè causæ bellorum interirent ; scelus alebat quotidie, ut vel crimine prælia nascerentur. Quis tandem hanc arrogantiam,

hos spiritus frangeret? nescit timere, quæ tanta sperat, nescit cadere, tot victoriis instituta. Ubi periculum, inquit, si noluerō periclitari? ubi hostis, si ipsa mihi non fuero inimica? didici vincendo quid possim. Sic plena sui Rupella se impudenti ore jactabat.

Movebat illud nos quidem, cum nobiscum funus istud domesticum viveret, penè tamen vetabamur fateri dolorem nostrum, miseriæque majoris metu, vix licebat in communi miseriæ vultum portare fortunæ. Sedebat enim in regni visceribus virus illud, quod sine miserabili pectoris totius laceratione non poterat evomi; quodque nisi evomere-tur, Respublica non poterat conservari. Oppresserunt Pannonas Hunni, Græcos Turcæ, Italos Ostrogothi, Hispanos Visigotti, Syrios, & Ægyptios Saraceni, sed illorum immanitas cum rebellium hæreticorum furore comparata, humanitas dici possit. Ferebamus jugum Franci, quæque cæterarum gentium servituti dat Gallia libertatem, ipsa servitutem à subditis quoddammodò tolerabat, aded probrium illud imperii,



perii, nec ferri poterat, nec auferri. Quid? non desperat propterea Carolus IX. sed anno millesimo quingentesimo septuagesimo secundo colligit totum robur imperii, floremque nobilitatis, conscribit numerosum exercitum, vim tormentorum maximam rotat, immensos sumptus facit, Ducem Andegavensem copiis præficit, qui illo bello Rex Poloniæ electus, felici sceptrorum ordine, venerandum Henricorum nomen, & seriem aucturus erat; & ab Sarmatico illo tyrocinio major venturus ad Galliæ principatum. Is Rupellam advolat, castra metatur, copias explicat, urbem vallat. Proh tempora, quam me labem refricare coegistis! Erat in armis pro Rege, Regis ipsius frater, Dux præstantissimus: arma Rex Navarræ conjunxerat. Henricus ille nondum magnus, qui & ipse feliciter successit in regnum: aderant viri Principes Condæus, Contynus, Duces Montis Penferii, Guyssii, Aumalæ, Nivernenses, Longavillæi, Bullionii, alique toto regno proceres infiniti: accurrerat ex mandato regio fortissimus ille Biro, cum cohortibus octo-

octodecim, turmis equitum septem,  
machinis muralibus undecim. Quid  
præterea quinquaginta millibus ar-  
matorum Rupellenses obsidentur,  
tormentis sexaginta nulla intermis-  
sione murum quatientibus urbs op-  
pugnatur, parte alia suffocatur,  
alia quassatur: fit labes ingens, & à  
vetsito urbis fonte ad Evangelii pro-  
pugnaculum, quod vocant, mœnia  
lacerantur: turris Cognienfis à fun-  
damentis evertitur, novies in urbem  
irrupitur, novies Rupella collata  
in unum omnium signa sustinet.  
Quid tandem? cecidit in irritum to-  
tus ille quam magnus fuerat appara-  
tus, stetit Rupella nondum benè  
degustata, fusæ obsidentium copię,  
mutilati non pauci, trucidati innu-  
meri, obtrita primæ acies, lacerata  
proxima, territa, dissipataque po-  
strema, viri principes multi misera-  
biliter cæsi, missa è tormento pila  
Dux Aumalæ interfectus, Dux ipse  
Andegavensis penè illa clade impli-  
catus, nisi excussum in illum plum-  
bum fidelis armiger nomine Vinsius,  
interjecto corpore recepisset; ac de-  
mum undecim millia nostrorum,  
calamitosa strage deleta. O rupem  
homi-

Ludovico XIII. 15

hominibus inaccessam ! O formidabilem hostem ! O inexpugnabilem civitatem ! qui pugnantium cumuli ! sed qui tumuli sepulcrorum ! accesserunt innumeri , facile fuit numerare qui recesserunt ! O rupes ! O clades ! O funera ! illa tamen Rupella , rupes illa , ille victor populus , populus ille tot ferè palmarum , quot capitum , tibi LUDOVICE , relinquitur debellandus . Hic habes Cannas Hannibal , hic Actium Auguste , hic Ciliciam Alexander , hic Carthaginem Scipio , hic Pharsaliam Cæsar . Accedant recentes omnes expugnatores arcium , & ampullati rerum gestarum amplificatores , suas expeditiones conferant cum obsidione Rupellæ . Verrucam jactant unum scilicet terræ jugerum . *De quo quis viso dicere possit , ubi est ?* Ostendam suam ostentant illudne receptaculum paucorum de navi hominum & exilium piscatorum ? Rhodum insulam memorant , sed interceptam , & Christianorum Principum auxilio destitutam : Iuliodunum afferunt , sed vasto murorum ambitu difficile adtuendum : Melitam prædicant , sed belli casibus superiorē : Viennam loquuntur .

loquuntur , sed inexpugnabilem Solimano: Metas celebrant , verè metas , quas antiquo opere malè munitas , Carolus tamen Quintus centum armatorum milibus fretus non potuit transgredi : Nos Rupellam dicimus expugnatam à LUDOVICO , cæteris omnibus insuperabilem : Rupellam , inquam , non vastam amplitudine , non desertam infrequentia , non pressam angustiis , non rudi defensam milite , sed in Regni finibus sitam , confœderatis gentibus finitimam , omnibus belli præsidiiis opportunam ; veteri quidem , sed multò magis recenti munitione formidanda : cujus portus non sit accersitus , fossaque quæsitus , ut Antuerpiæ : non incommodus , & difficilis , ut Iccius ; non periculosus , ut Ostendæ ; non vastus , ut Gratiæ sinus : sed tum loci natura , tum arte omni firmatus , ut incertum esset plus naturæ deberet , an arti , dum ars naturam superasse , natura nullum arti locum reliquisse videretur . Tantus nimirum esse debuit , qui ad arma Regem tantum adigeret ; alteri enim sit invictus necesse est , quemcumque LUDO-

DOVICUS oppugnat, qui cæterorum ducum desperationem in victoriam vertit, & per acervatos confectorum hostium cumulos, suorum currus agit triumphorum.

Mervenda quidem erat difficultas cingendæ civitatis, procellosissima præsertim anni tempestate: timendus hostilis exercitus, qui aderat è regione Rupellæ, Anglus ille mari cedere nescius infinitis navalibus præliis, victoriisque superbus: moram fecisset alteri locus ipse, qui stagnanti palude simul insalubris, atque subsidens, solus obsessuris erat relictus: occurrebat ingenium accolarum, quorum maxima pars, ut erat hæresis labe corrupta, ob ipsam quoque viciniam poterat esse suspecta: commovebant omnes, priscae tum externorum, tum civium nostrorum historiæ, qui tot, tamque numerosis exercitibus instructi toties frustra cum Rupella contenderant: videbat Rex ipse rebellium horrea cumulari expilatorum populorum commeatu, spolia provinciarum in urbem quotidie comportari, quodque gravius erat, non prælio rem posse confici, sed locum, stagna,

gna, paludes, æstuaria, turbines,  
imbres, procellas, terras, maria,  
desperatosque rebelles esse antè su-  
perandos, quàm Rupella potiretur.  
O difficultates immensas! ò inextricabiles series præliorum, laboresque perpetuos! quem non ista moles rerum oppressisset, quæ Regis animum omnibus difficultatibus celsiorẽ erexit! An putatis hoc aspectu negotiorum, bellorũq; nexibus esse commotum? audite quæ dixerit, dicturi sæculis quæ audistis. Ibo, inquit, ibo maioribus meis major, & nobile posteris argumentũ; tulit superior ætas, quod sequutura non feret; pereant, aut pareant, quos Deus nostro subjecit imperio; ad pedes cadat, qui mecum ad manus venerit, & infelix congressu nobilitetur interitu. Hæc oracula lituis, & buccina commutavit, conclamatum est ad arma, contractus exercitus, Rex ipse nondum è gravi morbo receptus, cum lectissima nobilitate fudit se Parisiis, militem rapuit, Rupellam advolavit, tenuit, cinxit, perdidit. In quo quid primum nos mirari jubes, Imperator; exordium belli, an exitum; celeritatem adventus, an


an constantiam obsidionis ? hostis audaciam , an fortitudinem tuam ? utrumque certè stupore dignissimum , nisi quòd teneor promissi reus , & necesse videtur seriem recitare totius belli , cujus difficultatem exposui : nos satis superque hostis audivit , te videat aliquandò : gaudeat Rupella de robore , dum te intueamur hoc altero orationis loco , de illius contumacia triumphantem .

Erat , ut diximus , concisus æstuariis locus , in quo uno castra metari Rex poterat , paludes interjectæ admodum insalubres , cælum crassum , solum lubricum , stagnum murum . Proh superi , per quot bella , ad unum bellum est ventum ! Quoties certatum est , ut semel certare liceret ! stagna oppugnavimus primum , antequam procellas expugnaremus , hæsit in palude nostræ militiæ rudimentum , ut in Oceano victoria tota consisteret . Solum arrisit disciplinæ , cælum affulsit victoriæ , locus ipse visus est dedisse locum virtuti . Castra montibus vallaverit Hannibal , Tamerlanes in urbis modum ædificavit , Attila militaribus pellibus obruerit , sarcinis Græci,

Græci, curribus Germani, testu-  
dine Romani se texerint: tu, Rex  
inclyte, qui nolebas suffurari vi-  
ctoriam, in aperto campo sedisti.  
In hac, inquam, æquata planitie  
noster explicatur exercitus, ut ho-  
stis implicaretur; Inferuntur signa,  
nè lateret adventus, urbs ex itinere  
salvatur, aded expetebatur. Dum  
hæc geruntur miles sortiri vultu per-  
duellem, terrere gestu, spe ipsa  
diripere. Nutasti, credo, furiosa  
rebellio, cum te foris LUDOVI-  
CI IUSTITIA, domi conscientia  
sceleris obsideret; impalluisti quæ  
ruborem amiseras, nunquam alba  
magis (quippe te urbem Albam præ-  
dicas) quàm cùm alba Imperii Lilia  
suscepisti. Sed quò à rege discessi-  
mus? immo verò quò Rex discessit  
à nobis? avolavit celeritate victo-  
riæ, en jam toto Rupellæ ambitu  
se majestas illa diffudit. Virtus  
nullis limitibus continetur, sed im-  
patiens claustrum, ultrò se jactat,  
sui nominis, & numinis explicatrix.  
Parum fuerat scilicet labore supe-  
rassè loci naturam, nisi artem vi-  
ctor noster ingenio superaret. Toto  
igitur continenti propugnacula ju-  
bet



bet excitari, aggeres extrui, val-  
lum duci, triumphum leucarum cir-  
cuitu, Rupellam fossis juxta, &  
interpositis stantiunculis, ad com-  
municationem armorum circumscri-  
bi. Sequuta est Ducis imperium  
celeritas operis inusitata; hic val-  
lum ferre, ille camenta convehere,  
lapidesque portare, palum alius de-  
figere, alius humum egerere, cespiti  
moliri tectum, fingere, induce-  
re, cumulare, exaggerare; sui-  
quisque gradus oblivisci, dignita-  
tem labore metiri, meritum opere,  
major ille prædicari, qui actuosior,  
ille præfici, qui plus aliquid perfe-  
cisset, pro se quisque demum con-  
tendere nè illo laboris certamine  
vinceretur. Addebas interim fati-  
gatis alacritatē humanissime PRIN-  
CEPS, omnium onera vultu porta-  
bas, laborem nutibus sublevabas,  
opus laudibus compensabas. Quid  
extulistis tantopere prisca monu-  
menta Dionysium, quod sexaginta  
millia operarum exerceret, cum  
mœnibus areas Syracusanas ambi-  
bat? quid Neroneam, historici,  
quod humeris orbem ferret, cum  
Isthmum Corinthiorum perfo-  
die-  
bat?



bat ? quid Caracallam , annales , quodd semper laboris initium faceret , cum in castris agebat ? quid Manuelem Comnenum , Græci , quodd saxa veheret , cum Dorylæum renovabat ? quid Constantinum , Romani , quodd tetrām foderet , cum magnificentissimi templi fundamenta jacebat ? LUDOVICUM habent Galli , qui singulis militibus adlaboraret , tantum ipse conficiens operis , quantum imperet universis : architectus in opere , miles in vallo , dux in agmine , ubique Augustus . Sed , ut video , dedignaris hanc laudem sapientissime REX . Tua tantum esse putas , quæ tecum nullus alius fecerit ; inavis ferre virtutis , quàm laboris encomium , illa in te egregia , hic tibi communis cum milite fuit . Pugnaverat Imperator ingeniosa compositione castrorum , reliquum erat , ut disciplina , & ordine militiæ triumpharet ; scripsit ergo militibus suis eas leges , quæ ut sibi scriberentur contendere ipsi debuissent ; docuitque prius vincere morum integritate , quàm firmitate nervorum . Et quidem quisquis in hæreticos pugnaturus est , debet virtu-

virtute, quàm manu certare validiùs. O novam bellorum faciem, novumque genus oppugnationis! hætenus creditum erat perverso, & præpostero præliorum usu, bellum sinè cæde, sinè facinore, sinè contumelia nūminis geri vix posse; sed ex quo nostrum militem vidimus à cruore, à libidine, à convicio tam alienum, credi cœpit inter ipsa arma, locum esse virtuti, scelusque non stipendiarium esse belli, sed voluntarium administrum arbitrii. Quid quodd totum exercitum concolori veste donavit, ut qui corporis cultu similes essent, solo animorum ornatu distinguerentur, & quantum alii bombyce, & purpura nitere amant, tantum ipsi virtute cæteris eminent: Ibant olim milites in aurea veste sub Antiocho, in picta chlamyde sub Sertorio, in purpura sub Cleomene, in expolitis armis sub Cæsare, in tubenti sagulo sub Artaxerse, in candenti tunica sub Cyro, in scuto puniceo sub Agesilaò, in fibulatis auro caligis sub Aureliano, in amictu argentea cruce signato sub Constantino. Ierunt nostri sub LUDOVICO, in veste non

ad

ad delicias molli, non ad pompam  
ambitiosa, sed ad militare robur,  
& pugnam accincta: ferro, non  
auro miles indiget, bellum ardore  
geritur, non nitore.

Interea dum vestem militum con-  
templamur, nudata est suis arbori-  
bus, vitibus, hortis, segete, sepi-  
bus tota, quæ ad Rupellam est,  
planities, distributus in classes, &  
manipulos exercitus, defixa signa,  
obtentæ pelles, substructa longo  
ambitu propugnacula duodecim in-  
ter se fossis continuata, dispositæ  
ex intervallo, vigilibus, & excubi-  
toribus stationes descriptione multi-  
plici, rotundæ, quadratæ, extan-  
tes, depressæ, projectæ, subductæ,  
lunatæ, cyclicæ, hemicyclicæ, tri-  
quetra, quadrangulares, variæ:  
perduellis denique civitas omni à  
terræ aditu prohibetur, cavendum  
est tantum ne evadat Oceano. Non-  
dum, ut fatear, qua parte vastis-  
simo sinu alluitur, conclusa erat,  
sed adhuc sedebat in portu, quia  
portum nondum classe tenebamus;  
quamvis enim ex utroque littore for-  
tissima castella objicerentur, undè  
multa uno ordine tormenta in navi-  
gia

gia detonarent, pervium tamen  
 erat mare, & facile ultrò citroque  
 commercium. Quis hanc Rupellen-  
 sis eripiat facultatem? Venerunt  
 quidem in suppetias exteri, ut hos-  
 tem ab insulis nostris expellerent,  
 sed serius appulerunt, sive quòd gra-  
 viores naves ducerent, sive quòd gra-  
 vissimam insulam (quam ream esse  
 omnes intelligunt) unus LUDOVICUS  
 IUSTUS posset absolvere. Et si verò  
 nostra felicitas invidit illis  
 victoriæ gloriam, hoc tamen fortis-  
 simi iudicandi sunt, quòd soli mare  
 tenuerint, quòd eos non expecta-  
 verit Anglus, quòd nullus obstiterit;  
 & qui tardius venissent, prius vice-  
 rint hostem, quàm viderint: est inex-  
 perti temerè in negotia ruere; lentè  
 festinare, sapientis. At at, dum ista  
 præsidia moras trahunt, tenet Occa-  
 num Rupellensis, eripiendâ sunt illi  
 maris effugia. Huc agite vestros  
 myoparones, minutissimosque pon-  
 tones Armorici, huc scaphulas, &  
 lembulos Aquitani; huc aphræctula,  
 & actuariola Cantabri; plus Gallus  
 poterit in liburnis, quàm in rotun-  
 dis, & constratis navibus Anglus.  
 Ita factum est, non sine omnium

stupore, navigiosis lenbulis, myo-  
parunculis vectariolis, celocibus, ce-  
leribusq; cursoriis mare tenuit LU-  
DOVICUS annum ipsum pugnare  
paratus, si hostem is animus habuif-  
set. Quis credat epibadibus cata-  
phractas, lintribus rostratas Britan-  
norum classes sustineri potuisse?  
Fuerit illud ad fortitudinis speci-  
men, erit quod sequitur ad terro-  
rem.

Non satis erat classibus insultasse,  
nisi insuper insultasset Oceano: ma-  
chinatus est igitur aliquid, quod ho-  
mines satis mirari non possent, ipsa  
maria pertimescerent. Intelligitis  
quod mea spectat oratio, jamque su-  
spicitis ædificatum in equore vallum  
illud, carceribus frænatos impetus  
indomiti hætenus pelagi, nè rebel-  
les à iugo se liberos fortè putarent,  
ubi mare libertatem amitteret. Quis  
posterorum, cum legerit, humano  
consilio factum putet? quis perduel-  
lium, cum viderit, neget pelagus ju-  
sticiæ stipendiis militasse? quis bar-  
barorum, cum acceperit, testes oculos  
non adhibere volet ad fidem? Illi  
ipsi, qui quotidie videbant formida-  
biles illas moles, qui pedibus calca-  
bant,

bant, qui militares in illis excubias agebant, suis sensibus non credentes, ed laborabant persuasione pertingere, quod Regis fortitudo pervenit. Iacienda moles erat, quæ totum sustineret Oceanum, nec ventorum quasata turbinibus, nec fluctuum assultibus verberata, nec æstus inundationibus superfusa, obrutaque titubaret. Pii principis erat hoc patrare miraculum, nemo id si maximè vellet, præstare potuit, præter LUDOVICUM XIII. qui primus voluit, quod potuit solus. Mare impatiens operis videbatur, nisi immensi laboris patientia victum esset; disceretque per gradus subigi, & favientis freti inclementia imperioso fræno coerceri. Unius numinis mutare sedes elementorum, æternosque rerum cursus obice temporario sistere; paret Deo natura omnium parens, cæteris hominibus imperat. Summa erat altitudo maris, sed altius adhuc Regis ingenium, rapidus vortex, sed stabile consilium Ducis; dubii casus, sed certus, & constans militis animus; varii undequaquæ metus, sed una omnium spes facilius esse nostro Principi, quæ vellet efficere, quàm

quæ efficeret ; velle , qui tetum successus sua voluntate definiens , etsi majora , quam cæteri omnes , fecisset in Gallia , fecerat tamen semper minora , & minora viribus suis. Quid ? jaci cæpit illius prodigii rudimentum , qua parte fretum erat angustius , satis longo tamen intervallo ab urbe dissitum , nè si remotius esset , architectorum laborem vinceret profunditas alvei ; si vicinius , labore hostiam vinceretur , & noceret propinquitas teli . Principio igitur defixæ sunt ad continendam futuram struem parte omni trabes ingentes , aliæ transversæ , & decussatæ , ut demissos lapides ingeniosis quasi brachiis amplecterentur ; erectæ aliæ , ut primos impetus fragerent , undas supercilio deterrerent ; quædam in quadrum ductæ , commissæque quadrando , stabiliendoque operi ; quædam in propedem , talumque projectæ , ut illa machinarum declivitate , mollique dejectu clementius fluctus exciperentur , ipsosque inoffensos inoffensa molitio refunderet pelago . Ingesta subinde generis omnis saburra , maxima vis lapidum temere jacta in profundum , superaddita cumulo



nulo prægrandia pondera, nondum  
 tamen oppleri potuit barathrum, sed  
 dum helluatur accepta, novis pabulis  
 inhiat, quin ponderibus attollitur,  
 effunditur, & amplificatur in vin-  
 culis: insaturabilis nempe quædam  
 est fames, inexplebilis alveus, &  
 alvus Oceani parte omni fauces  
 aperit, quæ pabulum objeceris, hac  
 vorabit, & saturitate voracitatem  
 accendet. Quis illius intemperantiæ  
 modus sit, & finis difficultatum? op-  
 posita quidem fluctus eluctabantur  
 repagula, sed adhuc soluta machina-  
 tio sine compagibus erat, sine com-  
 missura, sine cæmento, suis tantum  
 librata, firmataque ponderibus; ha-  
 bat malè materiatus murus, aquas  
 transmittens; conferti sine ordine la-  
 pides, cum fluctibus volvebantur,  
 & trahebantur in præceps, temera-  
 ria demum, & indigesta illa substru-  
 ctio, nullo nixa fundamento, hosti  
 risus ciebat, metum afferebat militi,  
 animos addebat Regi, qui malit cum  
 natura luctari, quam cum fortuna  
 triumphare. Nequè verò diu stetit  
 sine nexu fabrica, sed seipsas aquæ  
 prodiderunt, quæ dum se in rimas  
 saxorum insinuant, & crudum pa-

rietem interluentes tentant incondi-  
tam laxare compagem, secum cœno-  
sam uliginem convectabant, & luto  
quovis glutine tenaciori congeriem  
aridam officiosè adstringebant: per-  
vium murum repererant, sed aquis  
succedentibus limo incrustatum re-  
linquebant: transibant fluctus nun-  
quam redituri, & rimas implebant,  
qui labes facturi videbantur imma-  
nes. Quid porro? Hactenus succes-  
serat labor, sed ( ut fert natura ma-  
gnorum operum ) difficultas cresce-  
bat in manibus, & quæ fuerat initio  
maxima, major erat in progressu:  
Etenim quò magis ab utroque littore  
molitio recedebat, hòc gurgès altior  
erat, & quemlibet aggerem vasta  
vorago sorbebat avidius, æstus ipse  
turbulentius agebatur, insania flu-  
ctuum volumina medio alveo atro-  
cius bacchabantur, nostraque repa-  
gula quasi sibilos explodebant, mu-  
gitibus indignabantur. Iam deficie-  
bat materia, qua tam ingens cha-  
ribdis impleretur, & nisi latomiam  
fuissem supra quàm credi potest ube-  
res, & secundæ, periculum erat, nè  
lapidum penuria fabrica nostra pen-  
deret, sed tam dives vena fuit, ut ipsa  
faxa

saxa sub manum, ferrumque subo-  
lescere viderentur, cædum esse di-  
xisses lapidum nemus, quod depa-  
stum sylvesceret, grandesceret im-  
minutum: Hac tam fertili, & copio-  
sa officina fretus maturare cœpit  
Imperator obsidionem aquarum, la-  
pidicinas recentes aperiri jubet, no-  
vas rupes excindi, omni contentio-  
ne opus urgeri, conferri fragmina  
montium, sylvas adhuc ingeri, to-  
tas terras undis inferri, glebas faxis,  
saxa aggere, aggerem nemore, ne-  
mus scopulis, scopulos montibus  
acervari: obviam igitur materiam  
pro se quisque rapere, molaria pon-  
dera in mare volvere, terræ pene-  
tralibus pelagi viscera saburrare, ele-  
mentum elemento confundere. Stetit  
illa tandem vasta, operosaque sub-  
structio, veluti porticus toto eminens  
pelago continenti ordine fabricæ, nisi  
quod in medio salo apertus erat tole-  
rabilis aditus, nè omnino maria der-  
sperarent. Nolebas enim prohibere,  
REX PRUDENTISSIME, nè flu-  
ctus laberentur ulterius, sed cohibe-  
re rebellionem, nè iterum elabi pos-  
sent: duxisti quippè ab utroque litto-  
re molitionem directam, sed medio

alveo pendere jussisti obruptū opus,  
aggeremque continuare noluisti, ut  
omnes intelligerent, non quantum  
posses, sed quantum velles, fecisse  
te, qui poteras altum frenare, quia  
jussisses, cui viam faceres, quā vo-  
lebas. Iter undis reliquisti, ut rupto  
muro contumacem urbem cumulati  
fluctus invadentes, pergerent ad re-  
belles tuæ fortitudinis nuntii, spu-  
mantique fremitu loquerentur, quā  
ægrè, sinuosèque transissent: Quam-  
quam enim medio moles hiaret  
Oceano, defendebas tamen inter-  
vallum illud, multiplici lignearum  
machinarum ordine, & hinc qui-  
dem quā se mare latius aperit, lon-  
ga serie candelabrorum, ut vocant,  
naufrahiis prælucebas: inde verò quā  
itur in urbem, demersis operariis,  
junctoque navium inædicatarum  
rudente, hiatum incluseras, ut nul-  
lus accederet, qui firmitatem operis  
non probaret, ibique fortior esse vi-  
dereris, ubi vel robur muri defecis-  
set. Sic mare navibus, freno, ma-  
chinis, obice, milite, ponderibus re-  
nuit. O convulsos cardines rerum!  
O domitas naturæ vires! O humana  
miracula! hæsit in lubrico firmiffi-

ma moles ! non fluctuavit imposita  
fluctibus ! vortices fregit ipsa non  
fragilis ! ruentis pelagi fremitus au-  
diit statio surda , quæ dum oblueta-  
tur Oceano , argumentum furoris est  
hosti , exemplum constantiæ militi .  
O' nunquam audita prodigia ! stant  
aquæ ! fluctus ipsi pendent credo  
admiratione librati ! contra natant  
terræ , non natant tamen , sed in nau-  
fragio portum tenent ! Nostri milites  
pedibus ire , quæ nulla præcessit  
exemplo , nulla sequutura sit ætas in-  
genio ! tormenta rapere quæ vortice  
rapitur unda citatior ! excitare tem-  
pestates in sicco ! portum in tempe-  
statibus collocare ! ignes in aquis ac-  
cendere ! terris maria sociare ? Est  
adhuc in ista oppugnatione , quodd plu-  
ra quàm expectaremus regem perfe-  
cisse miremur , nec illis similem exi-  
tisse , qui nihil detrectent , dum nihil  
impleant operis . Satis erat nobis , si  
superioribus annis prætendi freto ca-  
tena ferrea potuisset , quæ maris com-  
mercium interdiceret hostibus ; ut  
autem Rex tot onerarias in mare de-  
mergeret ; ut tot muralibus machi-  
nis , missilibusque littus utrumque  
defenderet : ut trabes illas solidissi-

mas nexis capitibus excitaret; ut crudo aggere, glebisque struclilibus tam firmum luctamen procellis objiceret: ut super his molibus, fluctuantique vallo suum armamentarium collocaret; ut sine classe, classem Anglorum, classem undarum, classem turbinum retardaret, nullus ausus esset optare: Rex solus votis omnibus major, resstantibus licet Aquilonibus, & contra nitentibus frustra tempestatibus perficere potuit. Quoties enim procellas infremuisse putandum est, & immanes aquarum moles nostris molibus opposuisse? ut canes, sic fluctus objectis lapidibus adlatrabant; morsu invadebant, sed inani; Irruebant odio turbulenti, recedebant metu exalbescences, & spumei, viso hoste timidi, qui ante pugnam tumidi ferebantur. Alii repulsam iniquè ferentes, immani se supercilio tollere, vallum saltu transmissuri: alii verso in succedentes undas furore, eas vorticibus absorbere, tardare, & fugare se invicem, ut postremum agmen in bello sisti, fugarique solet, cum fractum primum occurrit: Illi tuere acrius, & toties victi, toties rebelles, renovare  
con-

conflictum; Iſti demum deſpondentes animo ſe victrici moli ſubmittere, & timore in reverentiam mutato libare oscula, blandiſque illapſibus adulari. Scio multis olim fluminibus impoſitos pontes, & ſæpè calcatam à magnis Imperatoribus aquarum eſſe ſuperbiam, ſed hi omnes, aut in opere ſtatim, aut brevi ab opere corruerunt. Iunxit Hellesponti quondam anguſtias connexa claſſe celebris ille Perſarum ductor, ſed quid factum illud habet miraculi, cum hæc ſit nativa claſſum ſedes? ſimilium navium contabulatione Bajanum ſinum ſtravit tertius ab Auguſto Imperator, ſed utrū majus videtur, puppes intuliſſe, vel terras Oceano? fecit in Munda flumine Iulius Cæſar ſtrage cadaverum aggerem, ſed ipſi ſanguis mutavere colorem ſuum, illum obicem erubeſcentes: Adijt quoque Tyrum Alexander navigabili ponte juncturus inſulam continenti, ſed diù fluctuavit illud opus ſine fundamento, idque ſemel hoſtis incendit, non ſemel æſtus abripuit. Legimus etiam ſaxeis pilis caſtigatam à Trajano, & Conſtantino Danubii, Rhenique ferociam, ſed arduum non



est fluviiis silentibus insultare : aquas  
 Bajas ad Avernum lacum deducere  
 tentavit Nero , sed hoc potius condu-  
 cit fossoris inventum est , quam Ro-  
 mani Imperatoris ; qui tantillo ta-  
 men negotio victus , opus abjecit .  
 Uni quippè LUDOVICO concessum  
 est ex omnibus hominibus , non au-  
 gere rivos , non fossas ducere , non  
 aquas avertere , non pontes jungere ,  
 non naves copulare , non paludes ex-  
 haurire ( in quo quæ potest esse tan-  
 ta victoria ? ) sed ipsos fluctus , quàm  
 spurci sunt , maria , quàm procellosa ,  
 tempestates quàm turbulentæ , obice  
 facto concludere . Velit fortassè in  
 laudis istius partem Maximianus Im-  
 perator accedere , quem Rhetor Bel-  
 ga neseio quis , Galliarum urbem por-  
 tu insignem oppugnaturum defixis in  
 sinus aditu trabibus , faxisque inges-  
 titis , in vium navibus locum reddi-  
 disse commemorat : at illa claustra ( ut  
 ejusdem rhetoris verbis utar ) qui  
 primus insiluit , æstus irrupit ; tota-  
 que hæc objecta fluctibus moles , qua-  
 si signo dato , ac peracta statione di-  
 lapsa est : nefas est autem simile  
 quidpiam de nostri principis opere  
 suspicari . Ibit miraculū istud ad po-  
 steros ;



steros, seseque ferent immortali fronte nostra repagula fortiora procellis omnibus, ipsoque profundo profundiora. Optarint majores nostri, istud aliquando fieret, quod ipsi facere nequiverunt; scient nepotes fieri posse, quod factum est: furoris tui terminum invenerit pelagus, terminus hic terminum non habebit: monumenta fient, postquam claustra esse desierint: poenas, qui vivunt, rebelles sentient, qui venturi sunt aliquando, pertimescent: docebitur omnis aetas sponte verti elementa, ut rebellionem evertant, ruere fluctus, ut haereticos obruant, qui pati noluerint Regis imperium, quod mare sustinuit.

Sed parco praedicare victoriam, quamdiu cum hoste pugnatur. Ecce enim Anglus turbat adhuc, quantum superiori bello ad Rheam insulam imminutus est viribus, tantum crevit audacia; superbus dum corrui animos dum multatur. Nondum se à proxima clade receperat, cum victoriis nostris institutus ad praelium tentavit semel atque iterum nostras vires primò facta excursione, tum simulato impetu conatus perumpere  
magis

magis repagula. O Stolidum, & Abderitam! quasi cum firmissimo muo, cum numeroſissimo exercitu, cū potentissimo Rege, illum sustinere non possemus, cuius classē antea sine navibus fregeramus. Quamquam ut video, furore rebellium ad istam impudentiam animatus est. Erexerunt enim pro muris proditores patriæ Rupellenses vexilla Britannica, ò infamiam! victos, victi ipsi vocarunt in auxilium, ò dementiam! Lutheranos, Calvinistæ! cives, exteros! Galli, Anglos! ò desperationem ultimam! ea vos signa sustulisse (nefarii desertores) quæ recens nostro militi ludibrio fuerant! scilicet illa vos oportuit explicare, tūm ut barbarorum esse, non Francorum illud scelus ostenderetis, tūm ut Rex noster duos hostes uno bello conficeret, sic enim visus est eodem tempore Gallos in Anglia, Anglos in Gallia vincere. Venit fulminaster Angelus, stetit in conspectu citrà ictum tamen, quia ferre noluit, sed aspici: prospecta nostra mole hæsit attonitus, illac suos milites aditum inventuros non credidit, quā vix ipsi fluctus viam haberent, ratus occlusum esse navi-  
bus

bus mare, patere naufragiis. Explicate tandem Britanni consilium vestrum, quæ causa adventus fuit? quæ tam diuturnæ moræ? quis arcenum illud aperiat? advolastis celerimè, diutissimè stetistis in anchoris: vela explicuistis, animos contraxistis: signa multa, signifer nullis apparuit: Leopardos vidimus in vexillo, lepores experti sumus in prælio: quàm similes vobis, Angli, quàm vestris navibus dissimiles extitistis? vos animo punitiones, illæ coagmentatione proceræ, hoc solum habuistis cum illis simile, quòd illæ tardæ ad motum erant, vos ad prælium tardiores. Ænigma fuit adventus vester, planè ducèdi fuerant divinatores qui solverent. Alii non Naumachiam, sed Bacchicam expeditionem esse dicebant vino Aquitanico metuendam, in qua plus meri fundendum esset, quàm sanguinis: Alii visendæ obsidionis, alii orandæ veniæ gratia, nemo prælii causa venisse suspicabatur. Qui semel fractus est hostis contemnitur, non timetur: ac nisi prædones in nostras insulas emisissetis, dubitare potuimus essetne hominibus vacua classis vestra, quæ in Oceano velut

velut in mare mortuo iners , & otiosa consisteret . Pudu it illos tandem ignaviae suae : reverti in Angliam sine vulnere noluerunt . facturi plagis fidem audaciae . Quis eos fortes putaret , nisi provocante hoste pugnassent ? quis cum Gallis crederet contendisse , nisi vulnerati redirent ? Simulacrum ergo exhibuere praelii , quod ut magnum non fuerit , fuit tamen honorificum nobis . Rupellensibus ; Britannisque fatale ; deduxere naves in aciem , explicuere vela , machinas disposuerunt . Gratulari sibi tam beatam diem milites nostri , se victores dicere , ex quo pugnare liceret , increpare tarditatem hostium , votis occupare conflictum , equites litus tueri , pedites molem , alii Rupellensibus opponi , qui exciperent erupturos , alii ad Anglos praemittere , qui segnes irritarent : quid ? laceffit Anglus celoces incendiarias ipse frigidus in nos misit : signum dedit buccina , sed receptu : tonitrus tormentorum edidit , quanquam non surdi eramus ad praelium : fragore pugnavit & sibilo , sed contra ventros : bombus fuit praeterea nihil . Tormenta audivimus , non sensimus : ignes aspeximus , sed fatuos : fumum  
vidi-

vidimus, sed qui nobis splendorem  
afferret, hosti eliceret lacrymas:  
ardebamus animo, dum pice, sul-  
phureque lucebat: lucebamus in ar-  
mis, dum Andabata pugnabat in  
tenebris. Quid tu interea, LUDO-  
VICE? qua diligentia simulanti pu-  
gnam Anglo occurristi? qua pruden-  
tia tot naufragos ignes avertisti? qua  
providentia terra, marique legiones  
instruxisti? quàm aprè librari machi-  
nas, quàm opportunè displodi impe-  
rasti? quàm unus fuisti, quàm mul-  
tiplex? quàm diversus in uno, quàm  
unus in omnibus, cum simul Anglos  
lacefferes, simul Rupellenses oblide-  
res, simul de utrisque triumphares?  
Ecquæm verò nobis de tua salute me-  
tum injectum putas, cum tot pericu-  
lis caput objiceres, & tuo capite sa-  
lus totius Gallie verteretur? Memi-  
nimus militi speculam tibi editam  
molienti, vndè citrà periculum pe-  
riclitantes videres, iratum imperas-  
se te opus illud continuo destrui,  
cùmque omnes à te deprecarentur  
periculum, addidisse. Nolle te æsti-  
mari de milite, nec per quæ trium-  
pharent cæteri, vincere; sed per quæ  
ipse vinceret, cæteros in otio trium-  
pha.

phare. O si animus ille pugnasset : quæ hosti vulnera, quæ exempla militi, quæ argumenta dedisset historia? Sed qui hunc ardorem aspexit, incendium timuit, imò tuo unius conspectu subactus hostis recessit in fluctus, ne si appulisset, pateretur in terra naufragium.

Quid ad hæc fœdifragus Rupellen-  
sis, toto mari prohibitus, terris omni-  
bus depulsus, orbe conclusus angus-  
to, & orbe exclusus universo? quas  
restes jugulis attemperabat? quas in  
mari voragines ad præcipitium vesti-  
gabat? Imminebant urbi per gyrum  
duodecim horrenda propugnacula,  
quæ terrent aspectu, fulminibus  
terrent: cernebantur, tumulis im-  
positæ longis suspectibus speculæ: ar-  
dui fossarum anfractus descensu ipso  
difficiles, ascensu insuperabiles oc-  
currebant: videbant inclusi perduel-  
les, enormia sibi quotidie parari er-  
gastula, stataria castra dies lætos in  
pellibus ducere, dispositas esse omni  
parte excubias: objiciebantur pro lo-  
rica castrorum munitiones lunatæ,  
cæmentitiæ geræ, crudæ opere ce-  
spitio substructiones, casæ subter-  
ranæ, valla protuberantia: pate-  
bant

bant liliata Galliæ signa, quæ vel  
suo candore perfringerent rebellium  
oculos: succedebant sibi majori por-  
tento, quam fide continuata mira-  
cula. Præterea nulli accessus, nisi ad  
pugnam; nulli exitus, nisi ad exitium;  
nulla colloquia, nisi ad deditionem fa-  
ciendam; miles undiq; & undique mi-  
les: arcem fossa, fossam vallum, vallum  
speculæ, speculas statio, stationem des-  
peratio, desperationem furca uno  
mortis tenore, ordineq; factorum ex-  
cipiebat: tenebantur deniq; fossis, ag-  
gere, vallo, ferro, cuneis, agmine, quid  
faceret? sed hæc tantum mali præludia;  
Accedebat ultima fames, telum quo  
nullum est in bello crudelius, quia si-  
mul ignavè, & atrociter perimit. Iam  
commeatus omnis erat absumptus,  
herbarum fibris solati erant inedia,  
radices in hortis, mures in rutis cæ-  
sis domorum, canum, equorumque  
morticina defecerant in stabulis: fri-  
xum, elixumque atro jure corium,  
& maceratas ocreas devoraverant;  
lethales venenorum succos in cibum  
verterant; in deliciis erat cicuta,  
auro toxica vendebantur; citrà pre-  
tium erat quod citrà horrorem dici  
non potest, difficilius erat vivere,  
quàm

quàm perire: & in funesto illo mortis, vitæque confinio, nec vivere licebat, nec mori. Nihil tam præsens quàm fatum, nihil tam remotum erat: longa tabe longiora crimina multabantur: vita trahebatur ambage malorum, & multiplicatis funeribus multiplicabatur in pœnam: mors denique cum vita consenserat, illa ut votum, hæc ut supplicium fieret. Tam misèrè hæretici vivunt, tam ægrè rebelles intereunt. Reptabant in compitis homines strigosi; macilenti, capulares, sinè carne pelles, exanguia silicernia, tenues umbræ, imitationesque vivorum, pallida mortis exordia, inanes corporum folles, ossium malè congesta compago, continuati ossibus nervi, vacui ventres, & queruli; viri, non jam viri, sed ferales hominum larvæ. Malè ominosus erat occursum civium, crescebat mutuo aspectu calamitas, dum quisque legit exaratam in alterius fronte capitis sui sententiam, & tanquam in mortis speculo, imminentis funeris imaginem intuetur: alter alteri mœstum divinæ ultionis fiebat exemplum. Se morti occurrisse putabat, qui in fratrem inciderat:

insup

omnes



omnes longa macie torridi videbantur, multati reorum vultus, cadaverosæ frontes, recedentes oculi, confusæ genæ, jejuna labia, otiosi dentes, & longi, subductum mentum, hiantes fauces, & aridæ. Digni erant tali jejunio jejuniorum nostrorum irrisores. Quid plura? vel ipsa mors visa est laborasse fame, ita ventre insaturabili omnes helluabatur. In urbe funeribus funera cumulabatur, mors desierat esse terrori civibus, quam usu quotidiano, domesticaque consuetudine familiarem habebant: timore sublato desperatio succedebat: calcabantur temerè, & sinè horrore mortuorum acervi: non lugebant aliorum mortem, qui suam expectabant: nihil filius patris obitu movebatur, quia naturam fortuna mutaverat. Unum omnium votum perire citò; metus longiùs vivere; solatium quamplurimos socios mali futuros. Projecta jacebant intèr in sepulchralibus viis sinè sepulchro cadavera, & nuda humo, nuda ossa volvebantur: Cœlo tegebantur corpora, quorum animæ apud inferos flammabantur: domus in sepulchra transferant, tamen erant omnes insepul-

sepulti: nulli, qui efferrent, aderāt, soli occurrebāt qui efferrentur, hæredes morientibus nulli, nihil ipsis etiam vermibus jure funerum relinquebatur: qui bonis succederet nullus erat, malis universi succedebant. Præterea dicebatur receptos Anglos, eò venisse furoris, ut vel cruenti hominum artubus pascerentur: ferales nescio quas matres, quo effuderant utero, eodem filios recepisse: alios corpus suū aluisse minuendo: inventum esse puerum, qui famen crudis demortui fratris carnibus satiaret; salita esse distractorum quorundam militum membra, similiaque voracitatis portenta occultè memorabantur. Rupella denique in carnarium versa erat: veros Tydæos & Menalippos, renovatas Busiridis aras, furiosaque Diomedis præsepia videbamus. Nulla in Urbe salus; quot cives, tot Sandapilarii, tot Massagetum popæ, tot carnivori Cyclopes, tot esse funesti carnifices credebantur. Hic amissum filium in mortuorum acervo quasi publico spoliario quærere: hic enectum fame abjicere; hic discerptum, & laniatum suspicari; Omnes denique plus caninam

nam libidinem dentium , quàm mor-  
rem ipsam , famemque timere: Quid,  
inquam, facerent? in restim rei sum-  
ma redierat; sola supererat obseſſo,  
aut clementia principis, sed noluit  
experiri: aut proprii ferri volunta-  
rius rigor, sed clam perire non me-  
ruit. Ubi grandes illi spiritus, qui-  
bus nostros exercitus disſilare poſſe  
credebatis Hæretici? ubi folles illi  
minarum, magnificæque verborum  
pompæ? ubi supercilium illud, cui  
tantæ victoriæ, tantæque tragædiæ  
nitebantur? O rerum conversiones!  
ò improviſam calamitatem, tantis  
tamen criminibus debitam! ò fa-  
mem! ò furorem! ò lanienam! Fi-  
dem jã habeo annalibus, cùm Cam-  
byſis exercitum referunt ed fame  
fuiſſe compulſum, ut decimus, quiſ-  
que miles ſortitò maceretur, ſer-  
culum inhumanum futurus: non in-  
fior ed veniſſe calamitatis Roma-  
nos, cùm obſiderentur ab Alarico,  
ut in Circenſibus ab Honorio Impe-  
ratore ſagigaret, humanæ carni  
prætium poneret: non nego Caſſi-  
noſed anguſtiarum redigi potuiſſe,  
ut apud illos mus ducentis nummis  
unus venierit, cùm Hannibal immi-  
neret:

neret : non revoco in dubium Calatitanorum inedia , qui , nè in Pompeii manus veniret , uxores suas , liberosque sale condierunt ad pabulum ; non duarum mulierum illatum furorem quæ Romæ , oppugnante Urbem Vitige , septem supra decem milites jugulatos devoravit : non Iudæorum decantata villam cladē , qui absumptis denique omnibus , ad iterquilinia , cænumque conversi sunt . Fidem horum omnium facit Rupellensis calamitas . Saguntinam , Perusnam , Melianam , Constantinopolitanam , Lydiam , Hierosolymitanam , Potidæam famem datur aliis legere , nobis datur intueri , dum Rupellensem videmus . Negoriosus interim in otio miles noster habitabat in tecto , sine armis præliabatur , Urbem obsidebat oculis , ludens vallabat , pacem alebat hoc bello , bellum hac pace conficiebat , relinquebat hosti moriendi spatium : Quamquam eos perire noluisti , Clementissime Princeps , qui spontè perierunt , tuo beneficio viverent : perditos ita perdidisti , ut ultra sævire non possent ; nequè tamen ita sævisti , ut omnino perderentur . Iratus es illis ,  
nè

nè diutius furerent ; latissimo ambitu conclusisti , nè premerentur ; vallasti , ut custodires ; custodisti sine cæde , ut ipsi sua sponte cederent ; fecisti denique sine invidia sanguinis , quod à me dictum sine invidia mendacii nulla postea natio crederet . Prædicabitis posteris bellicosam illam quietem , & pacem expugnatricem , dum agros sanguine naufragos , terras cædibus erubescences , exhaustas habitatore provincias , fluvios matato cadavere retardatos , famosasque laniena victorias duces barbari prædicabunt . Sunt illa gladii lucra , non sceptri ; furoris irritamenta , non belli præsidia : virtute , non crimine bella geruntur : cruore victor impotens , clementia moderatus vincit . Ergo noster Imperator pace maluit incruenta , quam funesta palma potiri ; maluit vincere , quam necare .

Non te movet hæc pietas , desperata Rebellio ? resistis adhuc tot fracta virtutibus ? Cede Rupella , cede clementiæ nisi parueris cessura justitiæ : Vive Regi , vel morere tandiu rea , quandiù clausa : tam improba , quàm hæretica ; disce occumbere , cum pudore , quæ sine fronte vixisti ;

C ,

disce

disce cadere , quæ toties cecidisti .  
Anglus desperat , Soubisius exulat ,  
Rohannus tenetur , mare concluditur :  
omnia te ad exitium rapiunt ,  
fames enecat , Rex obsidet , conscientia  
exanimat , quid dubitas ? pone  
superbiæ metas , pone modum audaciæ .  
Restitisti rebellis , cedendum est principi .  
Cessit , portas aperuit , Regem accepit .  
Triumphate Galli ,  
**LUDOVICUS** superavit : fortitudini  
regiæ ignava superbia , pietati perfidia ,  
pertinacia necessitati succubuit .  
Imminebat hyems , absumptus erat omnis  
commeatus ; reditum parabat in Angliam  
tâm sæpè fractus Britannus ;  
Accedebat in dies ad regia castra  
voluntarius miles ; exaggerabatur  
magis magisque moles in Oceano ;  
audiebantur in urbe miserabiles  
morientium voces , muliebres ejulatus ,  
clamores inconditi , tristesque  
vagitus projectorum infantium :  
populabatur urbem totam cum  
latis funeribus fames ; cives ad  
viginti millia extrema inedia  
interierant ; nihil intererat hostem  
acciperet Rupella , an retineret ;  
grasfabatur peior omni malo  
desperantis militis immanitas ,  
omnia sibi licita puta-

putabat furor publicus, ubique dabantur funestæ tragædiæ: citiùs sepulchra, quàm domos: cadavera, quàm homines invenisses. Mors locis omnibus occurrebat. Proh funestum, tragicumquæ spectaculum! Tandem Rupella tot oppugnata calamitatibus, expugnata est: submisit se Principi, triumphatorem admisit. O nobilem, ac fortunatâ victoriam! ò triumphum nulla ætate silendum! quo Aquitania pondere, quo opprobrio Gallia, qua peste Religio liberaris! annum obsidio tenuit, victoria sæculis omnibus permanebit: Vivet typis Rupella, quæ criminibus occidit: sibi perierit, posteris non peribit: corrui nostro tempore, æternitati stabit. Huc stylum, huc nobiles curas historici. Narrate populis rebellium funus daturum immortalitatem historiæ: fatum nescient scripta, quæ fatum hoc ferent. Quantus accedet splendor annalibus, cum, reverendis ducum nostrorum nominibus angebuntur, & populorum exempla fient memorabilia facta Gallorum? Attollet se in mediis historiæ monumentis sereno vultu, ætate vegeta, egregia dignitate

**DOMINUS** Regis frater, qui multo plus quam cæteri omnes lætatus est ob bellum illud confectum, cui felix ipse initium dederat: ardebat ille quidem conficere opus tam arduum, sed illud intellexit unius Regis felicitari, ac fortitudini reservatum. Et quidem argumentari possumus ex tam beatis exordiis, quid facturus fuisset in progressu: & vel ex hac una expeditione conjicere, quæ Regis fuerit de optimo fratre opinio; summe quippè difficultatis est, magnis rebus dare principia, & peritissimi architecti jacere ingentis fabricæ fundamenta. Eminebit prætereà immortali charactere Henrici Borbonii Condæi Principis inclytum nomen, qui cum Regis curas externis simul, & civilibus bellis divisas esse videret, ejusdem auspiciis profectus est in Galliam Narbonensem, & belli, gloriæque socio celeberrimo illo dnce Mommorancio, cujus quot hostes, tot victoriæ memorantur, repressit fortiter conjuratos hæreticos, signiferum factionis obsedit, Montem Regium, Fanum Severi, Castronovum, Calvam, Brassacum, Cresselium, Castrum urbem, & Mazame-



zametæ vallis Pentapolim occupa-  
vit : cepit ad triginta qua Urbes ,  
quæ Castella rebellium , quodque su-  
perat admirationem , triduo Apamiã  
illam amplissimam , munitissimam-  
que civitatem expugnavit : quantum  
denique Rex imperavit , tantum im-  
plevit , ut hostes intelligerent , nihil  
principum viribus , nihil Regum im-  
perii esse difficile . Tùm sublimi se  
vultu efferet posteritati venerandus  
Cardinalis Richellæus , qui virtute  
quàm nomine ditior , cum cæteri ma-  
nu , ferroque rem gererent , exem-  
plo , consilioque pugnabat : incom-  
parabilis vir ingenio , singulari pru-  
dentia , pietate spectabili . Habue-  
runt sanè conspicuos Pontifices ma-  
iores nostri : non invideo , dum unus  
sit instar omnium Richellæus . Op-  
posuit olim Italia Num tyrannis  
Ægidium prudentissimum Antisti-  
tem , Gallia Turpinum Sarracenis ,  
Hispania Ximenem Mauris , Aqui-  
tania Geraldū Lemovicensem An-  
glis , Bohemia Ioannem Pragensem  
Hussitis , Hungaria Gregorium Mar-  
tinusium Ferdinando , Dania Absa-  
lonem Londesium Slavis , Germania  
Huldricum Hungaris : unum dein-

seps nostra tempora omnibus oppo-  
nent hæreticis Richellæum. Neque  
verò hic stabit cursus annalium, quia  
non stetit hic animus, & fortitudo  
Gallorum. Legentur quoque cum  
admiratione Caroli Valesii Ducis  
Engolismensis præclare facta, qui  
cùm Rupellæ admovisset exercitum  
antè Regis adventum urbem cinxit,  
& jamdiu emeritus, de Gallia ta-  
men benè mereri non desit, laborem  
labore continuas belli principio jun-  
xit exitum, perpetuum hosti, vel o-  
tio certamen indixit, etiam, cùm  
cessaret occupatus. Stuporem præ-  
sertim legentibus afferes Schomber-  
ge præstantissime, cujus incredibilis  
ad bellum animus mihi quoque addit  
animum ad dicendum. Sed ferro sty-  
lum, manu ingenium vincis, sive  
enim te procellosissimo mari credis,  
cymba vectus exigua, & turbines,  
tempestates, naufragia, classes ho-  
stiles, mortem eluctatus ad oblectas  
insulas penetras: Sive cum parva mi-  
litum manu confertas Britannorum  
copias, & præsidia fundis, majora  
quædam homine facere videris, &  
nos quasi miraculis quibusdam op-  
primere. Venies etiam in partem lau-  
dis

dis Marilliacæ, qui venisti in partem laboris, scient ventura tempora quos hostes ad Rheam fregeris, quæ pericula adieris, quæ Galliæ trophæa erexeris. Tuque Thorasi invictissime, quem dudum gestio nominare, tu, quandiu manebunt, literæ (manebunt autem perpetuè) tandiu vindex patriæ, hæreticæ ultor audaciæ, Dux citrà invidiam maximus uno omnium ore prædicaberis. Esto, Rheæ insule propugnacula evertantur, stabunt tuæ gloriæ monumenta, nequè verò poterat tanta virtus loco tam angusto contineri, cui laudis campus parabatur immensus. Vigebunt denique memoria sæculorum omnium cæteri nobiles Galli, quorum animis etsi defuerint hostes, nullo tamen tempore defuturæ sunt laudes. Obiecit illis Rex maria? sinè navibus transmiserunt. Anglos opposuit? continèd profligarunt: molem in æquore fieri imperavit? Oceani altitudinem cumularunt. Quis hostes constantius expectavit? quis fortius excepit? quis celerius occupavit? quis invasit audacius? quis animosius? fudit? Mirabuntur exteræ nationes, stupebunt posteri, Religio triumphabit.

bit . Discant hæc miracula pueri , juvenes recitabunt , viri conabuntur imitari , senes narrare gaudebunt ; ætas nulla commendare desinet . Pictor vel ipsa tantarum rerum umbras suas tabulas illustrabit : Sculptor victorias illas durabit in marmore : mirabitur eloquentiam Orator hujus unius argumenti magnitudine superari : Poeta , cui hæc solida suppetent , cessabit inania prodigia fingere . Dabitur demum omnibus prædicare , quæ pauci fecerint , paucis facere , quæ prædicent universi . O te ergo non tuorum minùs , quàm tua ipsius virtute felicem ! **TER MAXIME LUDOVICE** . Tuis enim triumphis , quanta sunt ista , quàmque præclara ducum facinora militant , qui ut majora fecerint quàm ausi essemus optare , quoties tamen in te unum intuentur , fatentur ultrò se infinitis gradibus minora fecisse , quàm ipse exemplo fieri posse docueris . Universi demum rapiuntur in tuas unius laudes , & cum à nobis alium audiunt commendari , percontari solent . Regemne viderimus ? tum in manus sumpto radio hæc Rupellam describunt , & ducto orbe concludunt ,  
illac

illac maria derivant, isthac objectam  
molem ædificant, ordine castra com-  
ponunt, aciem terra, marique in-  
struunt, Anglos procul ostendunt,  
ac demum te singulis locis miracula  
dividentem exprimunt. LUDOVICUS,  
inquiunt, idem in vallo, idem  
in agmine, idem in classe, idem in  
aggerè, idem locis omnibus adest, pu-  
gnat, triumphat, quæ cum recitant,  
attonito auditore vallantur, quis-  
que gaudet, vel ipsa videre tuæ si-  
mulacra victoriæ.

Quid superest, nisi ut te superesse  
velimus imperio Ludovice? addant  
vitæ tuæ Superi annos, quos patriæ  
reddidisti: dent LUDOVICO sem-  
piternum imperium, reddant sem-  
piternum imperio LUDOVICUM.  
Vivat nobis, vivat posteris, vivat  
omnibus; ferat vitam, quam rebel-  
les amiserunt; aut si nobis debetur  
hæres aliquis tantæ virtutis, det  
Rex optimus sobolem se optimo me-  
liorem, nè quis unquam succedat in  
regnum, qui non ejus virtuti succes-  
serit. Quicumque deinceps venturi  
sunt ad imperium Galliæ (venturi  
sunt autem, quos ex te Rex dederis)  
meminerint qualis in imperio fueris,



nec aliud quàm Ludovici nomen ferant, dùm virtutibus impleant nomen illud Augustum, quod viruti consecravit antiquitas, posteritas consecrabit æternitati. Toties placebit, quoties recitabitur nomen illud, cum liliis, & palmis natum: nomen venerandum, semper antiquum, semper novum. Nullus sit finis **LU-DOVICORUM**. Iam quid à nobis exigis **INVICTISSIME PRINCEPS**, qui tibi totum deberi intelligis, quod possumus? gratias referam, sed laudatoris munus suscepi; laudem? sed agenda sunt gratiæ; & quamvis feceris, quæ ab omnibus prædicari debeant, effecisti tamen, ne quis ea prædicare posset, quia non minori virtute nostra præconia superasti, quàm claustra rebellium. Utinam toties victor, saltem semel triumphares. O si mos ille vigeret adhuc, quo solenni pompa victores portabantur in urbem, quantus foret Imperatoris nostri triumphus? quæ gentium acclamationes? quæ monumenta victoriarum? Iret ante currum depresso collo, subiectis cervibus, subactò vultu condemnata rebellio; currum traherent simul vin-

cti,

At, simul victi cum Rupellensibus  
 Angli, frontibus famulari jugo con-  
 junctis; succederent agmina vitio-  
 rum uno simul omnia loro devincta,  
 caesaque flagello virtutum. Illic tra-  
 ctus sonanti compede livor ringeret:  
 fremeret audacia sine telo: jaceret  
 arrogantia sine supercilio: moderet  
 invidia sine dente; debaccharetur  
 impietas sine voce, mæsta hæresis  
 sine viribus agmen clauderet. Qui  
 plausus interea, quæ in te laudes à  
 circumfusus militibus conferrentur?  
 Tu Benearnus, tu Cisalpinus, tu  
 Transalpinus, tu Aquitanicus, tu  
 Britannicus, tu Gallia dignior, tu  
 Patre felicior, tu Henrico Magno  
 major LUDOVICUS, festis vocibus  
 dicereris. Splendidi præterea tituli,  
 laureati lemnisci, sublimes imagi-  
 nes præferrentur. Ebore redderetur  
 infelix Rupella pretio majori quàm  
 merito, viverent adhuc in adaman-  
 te, quos in campo jugulasti, cæla-  
 tura, quàm vita nobiliores: Topatiis,  
 & amethystis splendorem adderent  
 virtutum tuarum insculpta mira-  
 cula; emeret in auro sublime pro-  
 pugnaculum Ludovicum: affurge-  
 rent juxta in argento Aureliacense,

Matilliacense, cæteraque tam nunc pretioso, quàm antea presso molimine firmamenta: præirent de conjuratorum manibus extorta signa superbiæ: toties victi BuKincamii simulacrum ferream domito collo catenam trahens, pedibus, manibusque revinctis, splendidum fieret pompe ludibrium. Nectare spumaret artefactus Oceanus, vallo non jam cespitio, sed adamantino circumclusus, lapillorum objicibus ambrosij fluctus alliderentur, imbres gemmeos frangeret moles in auro, erudito labore tundata. Alii denique LUDOVICO ponerent obeliscos, ut Sesostris: alii columnas erigerent, ut Trajano: tabulas illi fingerent, ut Alexandro: arcus illi flecterent, ut Constantino: Pyramides quidam excitarent, ut Nino: quidam currus jungerent, ut Cæsaribus; plurimi statuas erigerent, ut victoribus innumeris. Sic LUDOVICE IUSTISSIME triumphares. Quamquam, ut fatear, hæc minora sunt meritis; neque ulla reperiri possunt emblemata, quibus tanta Majestas exequetur. Non obelisci in metam efformati. Regis gloria metas nescit: non columnæ



lumnæ, quæ deorsum basi nituntur,  
cælo nomen illius innititur: non  
tabulæ, quæ pigmentis collucent,  
virtus ista factis, non coloribus illu-  
stratur: non arcus, qui curvantur,  
atque flectuntur, recta hic discipli-  
na militis, influxa constantia ducis:  
non Pyramides quæ puncto termi-  
nantur, LUDOVICI victoriæ ter-  
minos nullos agnoscent: non currus,  
qui præterlabuntur, non præreribit  
hoc factum: non statuæ demùm quæ  
obmutescunt; tanta prodigia non si-  
lebunt. Triumphasti de ingeniis ho-  
minum, qui cùm se impares rebus  
tuis omnibus exornandis agnoscant,  
in earum singulis singuli partibus  
occupabuntur. Neque verò propte-  
reà, ulla erit in iisdem factis enar-  
randis similitudo dictorum, sed in  
una victoria omnes variè triumphabunt.  
Quia tantùm, unus effecisti,  
quantùm universi laudare possint.  
Dicent alii pietatem illam spectabi-  
lem, qua exercitui prælucebas: alii  
fœlicitatem scribent, qua toties vin-  
cebas, quoties prodibas in aciem:  
alii prudentiam in consiliis celebra-  
bunt; alii fortitudinem in factis ex-  
tollent; multis conclusus, & subju-  
gatus

gatus Oceanus; multis merfus, & profligatus Anglus; omnibus Rupellæ fames, & funus occurret. Iam quàm copiosa dicendi vis ex fœssis castrensis eruetur? quàm arduâ fugerent illa propugnacula? quàm sublimem religio? quàm longam obsidionis infracta constantia? quàm magnificam tuus in Urbem ingressus? omnes postremò mirari poterunt se dixisse, quod aliorum nullus attulerit, pauciora tamen ab universis esse comprehensa, quàm unus fecerit **LUDOVICUS**. Tuum est estimare, Rex præstantissimæ, cum tuis laudibus non sufficiant universi; tum venia dignus videar, si de te paucissima dixerim. Fors erit (siquidē opera nostra placuerit) ut aliquandò maiora audeam. Perge modò perduellionis reliquias insequi, pergebust a illa patriæ, nostris malis inflammata, nostris diu conservata cineribus, aut dissipare consilio, aut cæde, sanguineque restinguere. Compede desperatio, non gratia cohibetur. Et sanè si multare pergis beneficiis perduelles, periculum est, ne præmiis invitati quamplurimi addantur numero desertorum, pluresque tandem hostes,

stes, quàm cives sis habiturus. Memineris te esse IUSTUM. Iustitia pœnas, & præmia dividit: nunc pœnam beneficio sustinet, nunc gratiam pœnis, suppliciiisque commutat. Age, ago, pauciora restant quàm feceris, & tamen nimis multa supersunt: ægrè virtutes, facile vitia propagantur. O quando licebit dicere: Omnino vicimus: Nullus rebellis tota Gallia superest: nullum grassatur bellum civile: nullus inter nos vivit hæreticus. Licebit certè, licebit aliquando, licebit brevi. Hoc omnes optamus: Hoc Christianus orbis expectat. Hoc propitium Numen continentibus, testatissimisque miraculis pollicetur.

64

# GENETHLIACUS DELPHINO.



**T**riumphate GAL-  
LE plaudite confœ-  
derati, crepidate ho-  
stes, ceditæ perduel-  
les, fremite barba-  
ri : VISITAVIT  
DOMINUS AN-  
NAM, ET CONCEPIT, ET PE-  
PERIT. Liceat enim Oratori Chri-  
stiano, quibus HEBRÆÆ quondam  
ANNÆ post cœleste puerperium ac-  
clamatum est vocibus, iisdem in  
communi omnium lætitia, argumen-  
to non admodum dissimili ANNÆ  
quoque AUSTRIACÆ foelicissimo  
partui gratulari. Non semper eadem  
Cœli facies ; jam serenum nubilo  
conditur, mox tranquillo fœdum mu-  
tatur. Post longa sæpè sitientis terræ  
jejunia, erumpit aquarum diluvium  
& quæ modò raræ ; nunc densæ nu-  
bes largissimos imbres effundunt, qui-  
bus æqua imprægnantur arentia. An-  
nus

nus jam tertius suprâ vigesimum  
 agebatur , ex quo Christianissimo  
 Regi sobolem conjunctis vocibus  
 precabamur , sed ipsa vox clamando  
 defecerat ; jam exhausta erant omnia  
 vota , cum accisis deniquè rebus ,  
 quasi profuisset ad extremum virium  
 devenisse , ut ad fastigium gloriæ con-  
 scenderemus ; nostra tandem deside-  
 ria cumulatissimè Deus explevit , fe-  
 citque munificentia sua , nè nos , qui  
 paulò antè nihil audebamus sperare ,  
 modò quidquam ultrâ optare possi-  
 mus. Illuxit enim aliquandò dies illa  
 tanto antè à Superis destinata , for-  
 tunata regno , grata civibus , exteris  
 splendida , optata bonis , invisa per-  
 fidis , nulli centè expectata , quæ re-  
 gia nos prole donavit ; ac proindè ne-  
 mo non videt quantæ à nobis Deo  
 referendæ sint gratiæ , cum non minus  
 turpe sit beneficii authorem dissimu-  
 lare , quàm ipsius beneficii penitus  
 oblivisci . Accedit præterea gaudii  
 seges immensa ; nam si quando ple-  
 bej , vilique familiæ nova proles  
 adjicitur , par est unumquemque læ-  
 tari : statuite , præcor , ubi non ter-  
 ræ filius aliquis de vulgo , sed augu-  
 stus infans de regio sanguine , isque  
 non

non post alterum , sed primus , nec paucis mensibus , sed plurimis post matrimonium annis nascitur , quanta omnium animos lætitia incessere debeat . Cæteri quippè liberi nascendo sortiuntur humilem plerumque fortunam , vel certè mediocrem , in hunc terrarum orbem quasi projecti , nè vacuus relinquatur , tenui sub lare vivunt parentibus additi ad laborē , à quibus denique non tam opum , quam miseriarum relinquuntur hæredes : Regum autem filii ipso ortu splendidissimi statim consecrantur imperio , ut postmodum fata hominum tractent , inter quos sedent ut Patres , eminent ut soles , coluntur ut Numina . Atque illud habet prætereà Princeps Gallia singulare , quodd ubi DELPHINUM suscipit , simul Ecclesiæ destinat PRIMOGENITUM FILIUM Potentissimum fidei defensorem , firmissimum Evangelio Columen , orbi demum universo è Christianissimis illis Regibus unum , quem nescio plus gentes verè Catholicæ venerari soleant , quàm avitæ religionis hostes ubique pertimescant . Quæ si omnia scribendo persequi velim , quemadmodum nullis

lis hoc beneficium terminis clauditur, ita finem nullum hæc oratio sit habitura: modus tamen adhibendus est aliquis, si minus gaudio, at certe stylo, in quo sanè non labor exiguus. Quid enim mihi assumam ex tam ampla rerum sylva? quid primum instituiam? quid postremum? Dicam civium acclamationes, & plausus? offerunt se mihi gemitus hostium. Galliam prædicem? Deus gratias reposcit. Finitimorum principum gratulationes, & officia referam? DELPHINUS noster mihi salutandus occurrit. Hujus ego dignum imperio vultum describam? quæritis audire, quæ passim de eo feruntur præsagia. Ità non habeo quid dicam, ubi tanta est dicendi materies. Quid? Duo certè, quæ hoc ex Natali præsertim effulgent, præterire non debeo, scilicet regis domus gloriam, & Galliæ totius felicitatem, quæ breviter hac oratione perstringam; de multis pauca, sed pro meis viribus multa. Præsertim cum unus omnia complecti noluerim, nè subirem eorum invidiam, quos in partem gloriosi laboris venturos esse confido: nec non mihi metuen-

tuendum foret, nè, cum cæteræ Gal-  
liarum Provinciæ ad regias DEL-  
PHINI cunas officiosæ, & venera-  
bundæ certatim accedunt, si lon-  
gius morarer, serius mea se sisteret  
Aquitania, & ad obsequium proce-  
deret extrema, quæ prima videtur  
Imperio.

Magna fuit semper conjugibus cu-  
piditas prolis, quodd hæc nuptiarum  
messis est, & quasi flos thalami, so-  
cialis amoris fructus parentum com-  
munis animus, pretiosæque reliquæ.  
Parentes quippe gaudent in liberis,  
veluti nativo quodam in speculo, se  
ipsos intueri, & proprio arridere si-  
mulacro. Nam cum sit amans sui  
natura mortalium, suam ut semper  
contempletur imaginem sese effingit  
in altero. Quid, quodd successione so-  
bolis gentilitiû nomen propagatur in  
ævum, continuantur generis stem-  
mata, unoque sanguine surgunt po-  
puli nepotum, in quibus quædam im-  
mortalitas feritur, ut quod natura  
non concessit hominibus diu vivere,  
id ipsi procreatione liberorum conse-  
qui videantur, per quos suum etiam  
ultra suus diutissimè, si minùs toti  
certè parte sui quadam, eaque opti-

ma



ma superstites manent . Vivunt ex parentibus filii ; sed , & vicissim filii parentibus vitā restituunt , dum naturam , quam ab iis nascendo traxere , tradunt succedentibus sæculis , & incorruptum majorū nomē ad ultimas ætates longa prolis serie trans ferunt . Accedit robur , & firmamentum familiæ , quæ , ut arbor luxuriosa radicū propagine , sic numerosæ , pulchræque sobolis præsidio nititur . Quantus enim ex nobili filiorum corona paternæ gloriæ splendor additur ? quanta etiam reverentia accersitur ? quia non modò conspectu suaves , colloquio , officiisque jucundī sunt , sed hoc vel maxime parentibus utiles filii , quod eorum amore nihil fortius , nihil fidelitate robustius . Timetur quisquis posteros relinquit nominis vindices , & potestatis assertores : omnium patet injuriis , qui nullum habet heredem dignitatis , & famæ . Quare solemne fuit cunctis propemodum gentibus , ubi proles deficeret , naturam arte fulcire & peregrinos successores accersere , ut ruentis familiæ casum ingenioso supplemento vitarent . Propterea Osirium Dionysius in Ægypto ,

pto, Pandides Ægeum, & Theseum  
 Ægeus in Græcia, Adamas in Caria  
 Alexandrum, Hildericum in Gallia  
 Sigebertus, Aurelius in Hispania  
 Veremundum, Luthprædus in Insu-  
 briâ Carolum, Theodoricus in Ita-  
 lia Herulorum Regem in filium  
 adoptavit. Neque Romani hoc loco  
 prætereundi, quibus pluresne liberi  
 fuerint asciti, quàm geniti, jure du-  
 bitet, qui legerit hac arte Tiberium  
 Augusto, Claudio Neronem, Piso-  
 nem Galbæ accessisse; familiis in-  
 fertas plerasque familias, Octa-  
 vianam Julæ, Æmilianam Africa-  
 næ; & Nervæ Trajanum, & Trajano  
 Adrianum, & Antonium Adriano; &  
 infinitos demum alios ab aliis ado-  
 ptione quæsitos. Nempe majores no-  
 stri hoc suæ orbitati remedium affe-  
 rendum putarunt, ut si liberos na-  
 tura negaret, solertia pareret, ac  
 intelligeret unusquisque, quo proprii  
 loco filii debeant haberi, postquam  
 tanti fuerint vel alieni. Sed quid pro-  
 fanis utimur, qui divinis abunda-  
 mus? Gentibus olim Numini mani-  
 cipatis summi beneficii loco promit-  
 tebatur *longæum semen*, & sæcun-  
 da progenies: iis; verò, quæ in sce-  
 lera

lera proruissent, Deus ad summum dedecus juxta, & acerbissimam pœnam, *sinè liberis vulvam, & ubera* interminabatur *arentia*; aded ut maledicto quodam afflatus, & veluti de cœlo tactus videretur, quisquis prius illis temporibus careret ornamento, ac solatio liberorum; & quantò matres suos tunc partus gloriosius numerabant, jactantes prægnantis uteri pompam, tantò steriles fœminæ ferebant acerbius infamiam solitudinis, & arescentium viscerum probra. Incedebant mæste, demisso vultu, veste lugubri, sinè nomine, quia sinè sobole; orbi penè invisæ, quoddam orbi haberentur ingratæ. Aliæ suam sortem in sylvis miserabiliter lamentari: aliæ Cœlum præcibus urgere, & quâ votis, quâ sacrificiis prolem querere; aliæ fœtus alienos sibi etiam subrogare, & ancillarum puerperio suæ sterilitatis labes implere: Tantus omnibus amor, & desiderium prolis.

Iam intelligis, Rex Augustissime, jam Regina sapientissima vides, quantum Majestatis vestræ decus accesserit, ex quo vobis nobilem filium, communem parentem nobis, Galliæ  
Augu-

Augustum olim Regem procreastis.  
 Auxit vos tandem hoc Deus munere;  
 quo nullum majus, hoc quidem  
 rerum statu, aut ipse concedere vo-  
 bis, aut vos ab ipso contendere po-  
 teratis. Fuerit is magnus dolor tan-  
 diu caruisse fructu connubii; abundè  
 sanè diuturnam mœstitiâ Deus hoc  
 pignore compensavit, quo simul ve-  
 ster nobilitatus est thalamus, simul  
 expletum desiderium, simul firmatum  
 imperium: ò gratiam singularem! ò bea-  
 ta tempora! ò non expectata mira-  
 cula! Meminimus, quæ regium animû  
 tristitia premeret, cum sibi suscipien-  
 dæ prolis spes nulla foret post tam  
 longa annorum steriliū spatia. Et  
 verò non poterat Rex optimus non  
 vehementer dolere, cum recogitarèt,  
 Regum tota Europa nemini præter-  
 quam sibi, deesse filium, & aulam  
 heredum vacuum oculis lustrando,  
 principum identidem ceterorū nata-  
 les acciperet. Quis tibi tum animus,  
 LUDOVICE? tum seusus orbitatis  
 domesticæ? quis prætereà nevus for-  
 tunc? Magna feceras huc usquè, Prin-  
 cept Invictissime, imò omni prorsus  
 fide majora; sed quò celsius tua te  
 virtus crexerat, eò naturæ injuria  
 vide;

videbatur atrocior, quæ summo Re-  
gi inuidebat, quod ipsi passim plebi  
concedit. Querebaris, tua ut solitu-  
do altius emineret, & qui longè latè-  
que fines amplificabas imperii, mi-  
rum erat donum te augere non pos-  
se. Iam Majestatis tuæ Numen ubi-  
que diffuderat, jam bella civilia ine-  
luctabili pace mutaveras, jam ero-  
xeras socios, & ruptorum fœderum  
vulnera ferro sanaveras, jam viru-  
lentam hæreseos saniem deteraseras,  
& rebellionis arcem everteras, jam  
ad Rupellam hostibus, procellisque  
superior altas maris voragines fatali  
mole compleveras, jam non minùs  
foris, quàm domi victor continuatis  
laureis prærupta Alpium juga trans-  
miseras. Immortalia sanè facta, no-  
bilesque victoriæ; sed operosius ali-  
quid tibi moliendum restabat; effi-  
cere tui similem. Ita in tanto rerum  
apparatu hòc minùs sælix videbaris,  
quia solus: neque enim fatis erat tibi  
vis opum immensa, non classium  
robur, & exercituum numerus, non  
imperii florentissimi gloria, non amor  
tuorum, non societates exterorum,  
non cumuli triumphorum, quandiu  
desiderabatur filius, qui vultus pa-

D

tris

tris referret, hæres, qui tantæ pondus gloriæ sustineret. Quidquid magnificè fortuna tribuisset, putabas exiguum, quòd felicitàti tuæ suum nondum addidisset natuta suffragium. Audiebas tu quidem passim Inviçtus exteris, Iustus subditis, omnibus Triumphator. Alii te rerum restauratorem, alii Domitorem hostium, alii immensi Regnatorem Oceani, alii Galliæ Numen alterum, Propugnatorem Italiæ, Britannię Fulmen, Iberię, Germanięque Terrorem, Europæ totius Arbitrium appellabant; Patrem verò hætenus vocare nemo potuerat, nisi quando Pater patriæ dicebaris; dulce adhuc aberat parentis nomen, quo indigebas uno, qui tam multis abundabas.

Parte alia Reginam, qua non melior altera, videbamus pari merore confectam, Divis, hominibusque supplicem, humi prostratam, nunc Deo dicatas edes pedibus adeuntem; nunc in vulgi turba demissè sacra mysteria usurpantem, nunc clàm subeuntem cænobia virginum, & religiosa captantem silentia, quò Cœlum suis aliquando precibus vinceret, & indè stirpi regiæ surculum duceret,

ceret, unde sciret antiquum liliorum  
candorem Galliae Regibus fluxisse.  
Nam tametsi infinitis gloriae titulis  
coruscabat, & magni Regis filia,  
majoris soror, maximi conjux, cæ-  
terorum denique Regum vel consan-  
guinea, vel affinis, omnia ferè Eu-  
ropæ diademata suo sanguini avita  
cognitione sciret esse conjuncta:  
quoniam tamen nondum Regis ma-  
ter, in tanta ubertate sceptrorum,  
orbitatem domesticam deplorabat,  
in mæstam solitudinem frequens au-  
la transierat, declinabat ipsa populi  
conspectum, à quo sibi Regem po-  
stulari sentiebat, ingemiscebat, se  
non parere principem tot principibus  
ortam, & quæ magni nominis fa-  
mam superaverat majorum exemplo  
virtutum, vivum sui exemplum po-  
steris non posse relinquere. Sed hunc  
deniquè mærorem excepit gaudium  
postquam Regi filium peperit: ò  
Galliam tibi, ANNA, vel hoc no-  
mine immortali nexu devinctam,  
quoddam Delphini natalibus fecisti  
regnis omnibus clariorem! ò suprà  
modum illustrem Reginam, ex quo  
nostro dedisti novum sidus Impe-  
rio!

D 2

Si

Si quis superioribus annis hujus prolis augur, & prænuntius accessisset, quos ille risus excitasset in plebe? quos in sermones incidisset, qui rem omninò desperatam vaticinando promitteret? Res enim erat hujusmodi, vix ut eam quisquam optare, nedum expectare auderet. Scilicet cum id maximè nostrę omnium preces, supplicationesque ad hanc diem incubuissent, ceciderant, tamen huc usque irritæ, & incredibile videbatur, quod tot annos frustra petieramus, Deum in hæc tempora reservasse. Votis ardentibus succederat triste silentium, & longis sessi clamoribus, Cælum, quòd ad nostras preces pridem obsurduisse credebatur, erubescerebamur adire; quin ipsi, quod sperare vetabamur, metuebamus etiā loqui. Memini enim, ante annos septem, cum Burdigalæ esses, REGINA AUGUSTISSIMA, & illustris Doctorum Academia, tui salutandi causa, ex officio convenisset, vetitum fuisse oratori, jam ad dicendum parato, nè quam de Delphino vocem mitteret, cujus tum aded nulla spes erat, tibi ut non tam benè precari, quàm illudere videres.



deretur, quisquis intempestivam illius faceret mentionem. Anno verò proximè elapso, cùm primum te gravidam rumor vulgasset, qui sermones ultrò, citroque sunt habitì? quæ plebis conjecturæ fuerunt? quæ civium judicia? qui sensus exterorum? illi dicere sparsam de industria fabulam ad exploranda vulgi ingenia; illi suspicari hanc inter belli molestias nobis fingi materiam gaudii; illi ridere in sinu, etiam in angulis cavillari; nemo fidem adhibere prodigio. Ut enim, quod quisque timet, citò credit, ita ægrè sibi persuadet accidisse, quod vehementissimè cupit. Et ecce vicit diffidentia nostram divina largitio, desiderium beneficii magnitudo; expectationem denique omnium tua, nostraque felicitas superavit. Didicimus fieri potuisse, quod factum est: & te jam nostram, ANNA, fatemur esse, postquam nobis diceris mater, Mater verè Magna, quæ Reges paris, Galliæ verè Regina, quam amplificas. O quanta es modò, quæ paucis antè mensibus de te tam modicè sentiebas! quantum emines, quæ latebas! imò qualis, quantusque tuus, idem, & noster,

per te LUDOVICUS occurret omnium oculis? quàm charus subditis? quàm formidabilis hostibus? Quid enim Rex suopte ingenio generosissimus non perficiat illo Heroe subnixus? quid vicissim Heros filius hoc patre non audeat? Erit aliquis, qui Galliam, vel non exoptet amicam, vel non pertimescat adversam? & cum uni pridem nostro pareant omnia Principi, quidquam aliquando conjuncto Principum duorum obsistat imperio? Ibit venerabilis, & altero tantò major, qui semper maximus fuit, tuumque, Regina, fatebitur esse, quod crevit; nos utrique vestrum, quod adeo sumus felices, referemus acceptum, illamque diem claro notabimus calculo, qua nostro in orbe surrexit ille Parelius. O nonas Septembres nobis æterna memoria retinendas! Observarunt quidem alii religiosè summorum virorum natales; diem illam Persæ perpetuò sacram habuerunt, qua Xerxes accessit imperio, eam Syracusani semper coluerunt, quæ Timoleonem, eam Athenienses, quæ Socratem peperit: Romanis quoque dies illa quotannis solemnis fuit,  
qua

qua urbis fundamenta jaci cœperunt; nec non Idus Juliæ Julii Cæsaris ortu insignes, Kalendæ Januariæ Titi, Decembres Nervæ, Novembres Adriani, Apriles Antonini, Februariæ Constantini, claræ natalibus olim Romæ magna cum pompa celebrari consueverunt. Nobis verò semper illa dies dicetur suprâ cæteras omnes beata, quæ regio præluxit Delphini partui: illa nobis in anni circumflexu redibit gratissima omnium, quam utinam placeret in posterum dici Delphiniam, ut in Asia quondam festâ quamque diem à Mutio libertatis vindice, Mutiam nuncupatam legimus; illamque Cyrus lucem, qua Sacas memorabili strage delevit, Sacam de ipsorum nomine voluit appellari. Quamquam hæc adhuc exigua, illi nos dei meliora precemur, quæ nobis affulsit optima. Luceat illa Sole perpetuo, quin etiam novis fulgoribus augeatur; immortalibus fastis emineat, & orbi Christiano recurraat semper augusta.

Ac certè quemadmodum jucundior nulla nobis illucescere potuit, ità nulla quoad recordari possumus,

maiores Galliae lætitiæ attulit .  
Quis non risit cū auctum filio LU-  
DOVICUM accepit ? quis non ocu-  
los sustulit , cum is nuncius ad aures  
pervenit ? sed quantæ ubique extite-  
runt signa lætitiæ ! Exaudiebantur  
passim confusæ tubarum clangori-  
bus civium acclamationes , testis un-  
dique pyris lucebant compita , ludis  
theatra personabant ingeniosis , Cœ-  
lum corruscabat missilibus igniū jo-  
cis , telus mugiebat repetitis frago-  
ribus tormentorum , sibi quisque de-  
mum gratulabatur illam diem , Deo  
miraculum referebat . Quid dicam  
redimitas emblematis statuas , &  
pyramides sulphureis jaculis fulgu-  
rantes ? Quid suspensos artificiosis  
nubibus soles , & pluvias vini jucun-  
das ? quid dies noctibus continuatos ,  
& noctes accensis fanalibus pertur-  
batas ? Hic florum congestæ messes ,  
illic extructæ dapibus turres ; Hic  
tripudiantium chori , illic convivan-  
tium globi : nec satis erat vintum ca-  
pacibus haurire poculis , nisi solutis  
etiam doliis funderetur . Parum vi-  
debatur erogare pecuniam , sparge-  
batur in vulgus , adeo quisque rerum  
suarum obliviscebatur , cū Delphi-

ni meminerat. Quæ satis ego mirari non possum, cum mihi redit in mentem, qui nuper erat vultus Gallorum: enim verò deformes non ita pridem, & squalidi videbamur, quia foris bella sæviebant atrociora, domi urgebant occulta mala. Iam plebeculam demessuerat dira fames, & ecce non longè post lues summis æquè, ac infimis meruenda supervenit: lues remiserat, bellum successit, quo nullum ante funestius: itaque nobis vita trahebatur multiplici, ac tortuosa negotiorum ambage. Sed hunc vultum cum fortuna mutavimus, metus omnis abscessit, postquam DELPHINUM aspeximus, qui sedabit procellam temporis, otia reducet antiqua, populos faciet inconcussa pace concordēs.

At enim liceat mihi à privatis regię domus honoribus orationem deducere ad commune Galliæ bonum, & post aulæ delicias nostram quoque fortunam diligentius contemplari. Qualem tandem futurū arbitramur hunc puerum, quem DEUS extra ordinem nobis concessit, LUDOVICUS XIII. perfecta jam ætate genuit, ANNA AUSTRIACA post

ardentissima vota concepit? Mos fuit antiquus nascentiū Principum partus curiosius inspicere, & ex natalibus conjicere, quid cuique fata servarent. Quam quidem divinationem nonnulli ex siderum observatione ducebant, uti fertur Tiberius Augustus imperium prædixisse Caligulæ: nonnulli arripiebant ex somniis, uti Cyri gloriam ex eo coniecisse narratur Aftyages, quod ejus mater sibi dormienti visa esset ex se palmitem fundere, quo tota latè Asia tegeretur; necnon Philippo præcognita dicitur Alexandri virtus, quod sibi in somnis leone feta occurrisset Olympia. Idipsum alii se colligere posse putarunt, subitos rerum eventus interpretando, quemadmodum Augustus dextri fulminis jactu destinatus perhibetur imperio: alii ex notis quibusdam à natura impressis vaticinando, quomodo ScanderbeKo Principi tot hostium victoria ea figura gladii, quam toto ejus brachio natura longè descripserat, invictæ fortitudinis præsagium fuit: alii ex verbis ipsis argumentando, quæ à se primo frangere solent infantes; ita quod Rex Pyrrhus maternis adhuc appensus

fus uberibus gestiendo, *Boulomai* vox Græca, Latine *Volo* primum dixisset, ea statim vox transiit in omen audaciæ. Quid consulta dicam oracula? quid ab orco quæsitâ mendacia? quid captata ab avibus auguria, & adhibita tempestatum, dierum, horarum examina? partusne contigisset amœno vere, an rigida hyeme? Kalendis, an Idibus? die Jovis sacra, vel Palladi? Infinite olim divinandi artes, sed totidem quoque fallendi: plurimæ fati conjecturæ, sed incertæ omnes, & vanæ.

Quarè valeant dubia Astrologiæ judicia; valeat Hetrusca veterum disciplina: nobis nec coitiones, declinationesve siderum astrolabio colligendæ, nec lituo describendæ Cœli plagæ, nec evocanda carmine Manium spectra, nec adeundus Apollo, vel consulendus haruspex ad auguranda Delphini nostri miracula. Prodit se satis illa Majestas suorum splendore natalium, nec celsam illius indolem metiri debemus peregrinis ominibus; quia nefas est cælestē fatum scrutari superstitione mortali, & quod Numen ipsum comprobavit, revocare ad sortem. Quis

enim dubitet augustam hanc Prolem divinitus esse concessam, cujus causa toties immortalī Deo solemniter supplicatum est? toties litatum? quas non opes in mendicos effusas, quas non preces in Cœlum emissas, quibus non templa donis, quibus non sacrificiis altaria cumulata cognovimus, paternis ut Rex aliquandō frueretur honoribus? Nemo nostrum non sæpè vocavit venturam prolem, nemo non genua flexit, & supplex adiit Superos, ut nostræ tandem orbitati consultum vellent, quia hæc summa votorum, unum omnium desiderium, Galliæ nasci DELPHINUM. Quo si gaudemus demum, gaudemus protectō Dei munere, à quo cum nihil fluat, quod non omnino sit absolutum, an non ab eo Principe tantum sperare oportet, quantum à proprio numine tribui consuevit? Atque nos idcirco Deus huc usque protraxit; hæc molestæ sustentationis origo.

Inquirebamus nuper quamobrem post tam longam à liberis solitudinem, is denique Regi obvenisset; Atque illi quidem causabantur magnitudinem operis, & longas rerum  
in-



ingentium moras ; nihil perfectum  
existere subitò , vulgus hominum  
citò nasci , quasi nullius momenti ;  
Reges ad mundi gubernacula com-  
paratos in lucem difficiliter erumpe-  
re , & longa fingi meditatione natu-  
rę . Illi morem Numinis afferebant ,  
quod sua quidem beneficia , prola-  
tando commendat , nos verò dissimu-  
lando exercet ; ita fidem probari no-  
stram , erudiri constantiam , necnon  
quę serius , ac difficilius obtinentur ,  
diligentius conservari . Nonnulli se-  
cus interpretantes preclare factum  
arbitrabantur , nè quàm ardentem  
à nobis regia proles ab ipso statim  
Regis connubio esflagitabatur , tam  
celeriter prodiret , quod LUDOVICUS  
noster tum admodum juvenis ,  
si filium suscepisset , brevè regni so-  
cium habiturus fuisset , nec orbis duo-  
bus sufficere potuisset , qui uni penè  
videretur angustus . Nonnulli ver-  
tebant se , ad arcana naturę , quę se  
ipsam interdum excusso corpore ve-  
getat , post otium actuosior , cum  
ipsa mutetur corporis habitudo , &  
ętas succedat ętati ; hęc enim ali-  
quandò seges est , ubi fuerat solitu-  
do . Alias demum alii insperati me-

morabant causas eventus : mihi tamen sic semper animo persuasum , tam diu negatam optimo Regi sobolem , ut cum ejus obtinendę spes omnis corruisset , certò liqueret , quis tanti beneficii auctor esset habendus ; ipsique fateremur hunc puerum non tam enitentis naturę labore , quàm indulgentis dono providentię genitum . Quod intellexisse te , Rex præstantissime , satis indicasti , cum recens editum regis manibus excepisse diceris , non ut primis indulgeres amplexibus , & paternum nomen osculis initiares , sed ut creditorem agnosceres , & Cœlo delapsum pignus Numini consecrares . Nec multò post audivimus Reginam (cujus quoties nomen incidit , offert se mihi statim divina quædam pietatis effigies ) hoc prædulci onustam pondere processisse ad aram , & inter solemnia sacra flexis genibus , religione singulari , sanctis perfusam lacrymis Deo partus sui dicasse delicias ; nè cui liceat in posterum dubitare , quin acceptum sit à Numine , quod ab utroque parente videmus Numini redditum .

Quippè neuter ignorabat Deo  
sem-

semper placuisse primitias, quas profana etiam antiquitas vanis Deorum simulcris offerendas putavit. Nam & Sabinos veteres accepimus Deo Termino pubescentium segitura comportasse manipulos, & Iſidi recentium uvarum sanguinem libasse Sacerdotes Hetruſcos; Græci prætereà Veſte frugum principia, Romani Jovi Feretrio nova offerebant hoſtium ſpolia: quin matronis ſolemne fuit prima muliebris mundi ſymmata de templorum tholis ſuſpendere, nec Theſeum puduit Apollini Delphico comæ naſcentis exordia conſecrare. Superſtitioſa iſthec, & vana, ut tum ferebant tempora. Vos, parentes optimi, quibus auguſta de Cœlo mens, antiqua pietas, vera religio, vero, æternoque Numini obtuliſtis puriores primitias thalami, nec aliena dediſtis, ſed veſtra, proprium ſcilicet ſanguinem, communem vitam, ipſa denique viſcera. In quo quid impenſius admirari nos decet, tuam LUDOVICE fidem, an tuam ANNA pietatem? doni magnitudinem, an dandi modum? Magnum eſt quod dediſtis, ſed effundebat ſe veſter animus ad  
ma-

majora, & largiendi voluntate quàm facultate ditiores, regium donum, quo nihil potius habuistis, prosequuti estis lacrymis, auxistis affectibus. Sed hæc Deo secreta patuerūt, nobis non licet tam altos scrutari sensus; satis est, quem vos ipsi tacitè devotebatis, vidisse aris oblatum, & suspensum manibus, quem corde gerebatis infixum. O solium Delphino dignum! O dignum altaribus ferculum! Suos quondam Principes, cum nascebantur, Scythæ clypeo extulerint, ad belli præludium; suos Athenienses sacerdotalibus infulis rexerint, ad pacis auspiciū; Persæ adverso Soli opposuerint, ad religionis specimen; Romani humi straverint, ad miseriarum exemplum. Turcæ militari vexillo, ad jactantiam; Græci purpurea clamyde, ad pompam; Parthi casside ad ferociam exceperint: Delphinus aris erat imponendus, ad æternum pietatis regie monumentum.

Sed quò mea sensim se subduxit oratio? mihi de nostra omnium felicitate dicere meditantī nova semper occurrunt miracula. Quæro tandem, in quem virum sit evasurus

Prin-

Princeps his natus auspiciis , his caeremoniis inauguratus ? Ingentia sunt, non humilia Dei dona, minora quidem opibus suis , semper tamen meritis hominum celsiora ; ac proinde munifico Numini facit injuriam , quisquis ab eo putat aliquid concedi mediocre . Meniores estote , Galli , quantum acceperitis victorem in Philippo Augusto , quale sidus in Divo Ludovico, quos parentum preces nostro quondam imperio pepere-  
runt : Prædicate Ægyptii , qualem videritis in Iosepho moderatorem , quem Deus effatæ Patris senectutî concesserat : Dicite Hungari , qualem habueritis Regem in Stephano, cujus natalibus præluxit cæleste prodigium : Referte Hebræi , qualem susceperitis in Isaaco Patrem , in Samuele Iudicem , in Ioanne Solem, quos sterili prognatos thoro universus orbis suspexit . Nihil est à Cælo commune , à quo , qui nobis Delphinus exiit , non potest non esse Magnus . Quamquam hæc si adessent divina suffragia , sufficerent puero exempla domestica , cum sanguinis ille degener esse non possit, nec à Rege Christianissimo , Religiosissima-  
que

que Regina quisquã edi nõ optimus. Ut fructus arborum naturam sequuntur, sic ferè liberi parentum mores imitari solent, & non vultum tantum, sed indolem quoquè ferè simillimam. Iam ex utraque stirpe quanta Delphino sese offerunt incitamenta virtutis, nolim à me quidquam hoc loco per assentationem dictum, quia nec virtus calamistro, nec cothurno veritas indiget; verum ut hæc mendacio crescere non potest, ità non debet premi silentio. Eo sub Rege nos vivimus, cujus non modò quisque optet imperio subjici, sed ut subjiciatur etiam contendere debeat. nimirum illius vita, si æquius æstimetur, censenda est magna quædam virtutum thesis, & velut collegium miraculorum. Si dixero bonitate incredibili, altissima prudentia, equalitate perpetua, eximia pietate, summa fortitudine præditum: minus, quàm debeam, prædicem; quia, quæ reliquis Principibus laudi singula tribuuntur, in nostro uno mirabiliter coeunt universa. Quem non suo statim vultu recreat si comparet? quem non demeretur, si dignatur alloquio? Pascit intuentium oculos,

&

& licèt magno jam nomine totum latè orbem impleverit, tamen contra quàm cæteris accidit, major semper conspicitur, quàm soleat prædicari: adèd ut, qui Regem nunquam viderint, summo ejus videndi desiderio teneantur, majori metu amitendi, qui vident: abripitur, ad eum quisquis accedit & quæ est divinarum rerum natura, ità sibi omnes affixos tenet, nemo ut ab eo non recedat invitus, quisquam vix avelli possit. Quamquàm illa Majestas etiam absens coli solet, quos enim sua non præsentia reficit, rerum gestarum fama percellit: etiam iniquissimos quosque suæ gloriæ obrectatores ità perstringit, ut incertum sit, plusne diligatur à subditis, an prædicetur ab hostibus.

Quid ergò jam Reginae virtutes dicendo commemorem? quas sanè multas, maximasque esse oportet, postquam Rex tantus eas suspexit, omnes tacito quodam instinctu palam efferunt. In ea quippè non modò acre viget ingenium, sed tam casti præterea mores elucet, tam egregia fides, tam solida pietas, tam insignis mansuetudo, ut cum dignitatem

tem summæ fortune retineat, nihil  
 suprâ communem sortem assurgat,  
 eaque sit omnium vox, si quis Regi.  
 nam in media turba aulicorum in-  
 temoscere velit, facile cogniturum,  
 dum observet modestissimâ omniû.  
 Cultu simplex omnem longè ornatû  
 superat, semper animo tranquilla  
 nescit aulæ strepitum, omnibus deni-  
 que virtutibus cumulata facit, nè  
 nos Clothildes, Blancas, Radegun-  
 des, Eleonoras, Elisabethas, Mar-  
 garitas, Catharinas majoribus no-  
 stris invidemus, postquam tene-  
 mus ANNAM, quæ paucas sibi Re-  
 ginas vidit æquales, nullam habuit  
 gloria superiorem. Equidem quoties  
 Regem, vel Reginam intueor, exi-  
 stimo videre me spirantem honesta-  
 tem, radiantem sapientiam, arri-  
 dentem humanitatem, sedentem  
 constantiam, liberalitatem erum-  
 pentem, imperantem justitiam, re-  
 ligionem triumphantem, quæ in utro  
 majora sint, difficile est comparando  
 judicare: in utroque profectò sunt  
 tanta, quanta summis Principibus  
 optari possunt.

Quarè vestrum est Galli, ex ea  
 semente messem aestimare, quam  
 col-



collegistis; magna siquidem vis est  
in genere, propterea quod communione naturæ, non modò parentum sanguis derivatur in venas succedentium liberorum, sed ipsa eorundem virtus in mentem quoquè transfunditur; adeoque si quante sunt in utroque parente tum ingenii, tum virtutis dotes, tantas postmodum in regio Delphino visuri sumus, (quod par est unum quemque nostrum sperare), quis omnibus retrò sæculis Princeps major, meliorque surrexit? Si Patris vigilantiam obtinet, quis solertior? si Matris dignitatem, quis spectabilior? dum illius clementiam referret, quem non vincet officiis? dum hujus modestiam imitabitur, cui non occurret augustus? Accedat ad Regis fortitudinẽ, cuncta suo adjunget imperio: succedat Regina pietati, nullum non rapiet virtutis exemplo: Æquet Ludovici justitiam, quid non illo Legislatore moderatũ? Excipiat Annę sapientiam, quid non illo Rege perfectum? utriusque demum retineat indolem, videbimus gravitatem urbanitate, modestia principatum, majestatem popularitate conditam; & quidquid habet

Gal.

Gallia nobilitatis , & gloriæ , quid-  
quid Hispania amplitudinis , & fame ,  
in hoc uno collectum ad mundi do-  
minium .

Atque hunc vigorem , hoc impe-  
rium toto jam illius vultu eminere  
audio ( neque enim fas omnibus eò  
testes afferre oculos ) Regem spirare  
dicitur adhuc infans ; jam affusus  
genis lepos , & dignitas , quæ Prin-  
cipum esse solet ; jam fronti decus  
impressum , cujusmodi Heroem de-  
cet : jam fulgor inditus oculis , qui  
fidereum , & cœleste aliquid sapit .  
Cernitur uterque parens unius in  
ore ; excelsum caput attollit , quasi  
thoro , vel in cunis jacens , regno  
emineat ; figit obtutus imperterritos ,  
quasi gentes jam nutu terreat , suo  
brevis ferro domandas : manus expli-  
cat audaces , quasi sceptris aptare  
velit ; teneriter firma exercet bra-  
chia , quasi præludat hostium fatis .  
Ecquem verò metum circumjectis  
hinc inde nationibus barbaris incus-  
sum fuisse putamus , ubi primum de  
Delphino audivere ? An non ipsis  
visi sunt prisca illi Gallorum Reges ,  
tot gentium superbi victoriis , quo-  
rum imperio universus ferè terrarū  
orbis

orbis succubuit, hoc infante renasci?  
O Galliam hac in primis prole felicem! Nunc longas tibi, Regina, partus moras ignoscimus, quas tam glorioso sc̄nore reparasti: jam intelligimus non nimis diu expectatum fuisse, qui tantus futurus erat: quin ed gratior accessit, quò serior: eumque tu, Mater Augusta, tardiùs emittere debuisti, ut ex sanguine jam maturo coalesceret fortior. Siquidem ad concipiendum difficilis, lenta etià partu fuisti; & cùm ad annos tres, & viginti sc̄tum suscipere distuleris, in decimum præterea mensem gestasti utero, tum quia Princeps non eadem, qua cæteri, celeritate funduntur, & qui Rege prægnans est uterus, ægrè patitur tam superbo se onere liberari; tum quia operosum est, quidquid excellit, & longo spatium cuditur, quod æternitati sacrat. Sic uniones videmus avaro Cælo singulos sudari lentè; sic elephantum toto biennio uterum ferre, & sc̄tum moliri; sic leonem post longos naturæ conatus unum edi partu generoso, sed raro.

Hoc unum ad sc̄licitatem Galliæ sempiternam optandum restat, ut  
cum

eum ad multos annos superstitem videamus, quem, ut liceret aliquando conspiciere, diu multumque contendimus; & longius tantò vivat Delphinus, quantò cœpit vivere seriùs. Quod ipsum & si futurum semper speravi, maximè ex quo dubitat nemo, quin hunc Regi filium Deus singulari quodam munere concesserit: tamen auget multò etiam magis spem meam eximia Regis pietas, qui eundem vix dum alvo materna conceptum, Virgini Deiparæ, una cum amplissimo regno, solemni ritu consecravit. Hic enim, LUDOVICE, præterire non possum insigne illud religionis tuæ monumentum, quod, dum hominum genus erit, nulla non sæcula prædicabunt. Iam tibi desideratæ prolis spes non inanis affulserat, jam pretioso fœtu Regina distendi cœperat, cùm tu miraculi intelligens, ut beneficium, quod pietatè merueras, pietatè rependeres, idque cum fœnore, non modò pignus acceptum, sed & præterea universum, quàm latè patet, Galliarum Imperium, Augustissimæ Domine nexu perpetuo devovisti, nè quos haberes in subditis, quos illa  
sul

fui nefeiret eſſe mancipii . Imò verò  
juſſiſti nos tuæ devotionis eſſe con-  
fortes , & tecum ad pedes Magnæ  
mundi Imperatricis procidere , ut  
gratiam , quæ pertinebat ad omnes ,  
ſinguli agnoſceremus , & tum Regni  
dedicatio perfecta haberetur , cum  
eam quiſque voluntario firmave-  
ret obſequio . Eſſi enim tu , qui omnium  
in te fortunaſ colligis , unus ſponde-  
re poteras pro omnibus , & Rex ma-  
gnus perſonam implere humilium  
ſamulorum ; tamen , nè cogi videremur  
ad ſervitutem , dum nos inau-  
gurabas ad ſanctitatem , decuit , ut  
ipſi tuum non minùs ſpontè imitare-  
mur exemplum , quàm facile ſeque-  
remur imperium . Quale fuit illud  
ſpectaculum , quamque jucundum ,  
cum ſe infinita toto regno viſ ho-  
minum , ordines univerſi , cætus ,  
ſocietates , collegia , municipia , ca-  
ſtra , urbes , provinciæ ad Almæ vir-  
ginis aras ipſo die , quo Aſſumptę in  
Cælum triumphus agitur , effude-  
runt ; Atque hinc Rex ſuo major  
Imperio , inde Regina ſætu gravior  
magnifico in genua procubuerunt ,  
ut ſimul omnes Galliam potenti  
Cælorum Regina , ſimul venturam  
prolem

prolem augustæ Dei Matri, uno consensu voverent: O magnum præludium gloriæ! O benè, ac feliciter auspicatam Delphini sortem! Sic regius Infans nondum terris monstratus, Cælo militare didicit; prius initiatus; quàm eductus; ante superis addictus, quàm nobis editus; sponsores iidem fuerunt, qui parentes; regni obses idem, qui hæres: Ecquid hoc infante beatius, quem citius Virginis manus excepere, quàm obstetricis? quid MARIA tutrice securus, cui se Deus ipse regendum dedit? Hæc imperium Delphino, hæc Delphinum servabit Imperio. Quod si nostra adhuc exaudiuntur omniū vota, nemo certè illo felicità regnavit, nemo diutius vixit. Ille sibi gentes, quas bellicus furor toto orbe divisit, conciliabit universas: ille subditis, quos habebit innumeros, omnibus superstes erit: ille cū Leonibus Leopardos, cum Liliis Aquilas immortali pace componet: ille barbaram gentem Othomanorum, & nocturnum crescentis lunæ fulgorem extinguet; ille ad orientem juxta, & occiduum solem suæ Majestatis numen diffundet: ille victoriis orbem

bem terrarum peragrabit , Clodovæis illustrior , Pipinis fortior , Carolis felicior , Philippis Augustior , Henricis major , Ludovicis ( si quid eorum addi potest pietati , & nomini ) etiam melior : Ergo vivat , qui nobis divinitus extitit Delphinus , & tot annos vivat , quot nascituro vota concepimus . Vivat , donec nullum hostem Gallia sentiat , nullum Europa patiatur hæreticum , nullum Ecclesia non sibi subditum videat . Vivat , secundus Regi , qui genuit , Reginae similis quæ peperit ; Gallia major , quæ flagitavit , Superi , qui dederunt , æternum servant ; cives , qui petierunt , patrem sentiant ; exteri , qui timuerunt , victorem fèrant ; fèderati , qui exoptarunt , triumphantem videant . Diu expectatus , nunquam recedat ; miraculo genitus , miraculis fulgeat ; Cælo delapsus , terris imperet , **LUDOVICUS** meruit , **LUDOVICUM** æquet ; **ANNA** obtinuit , **ANNAM** felicitet ; Gallia suscepit , Galliam amplificet . Augustæ proli anni mille , Imperatori novo coronæ mille , Delphino Gallico victoriæ mille ? ut pacem reducat , ut hostes conterat ,

ut


ut oppressos liberet , ut Ecclesiam  
 protegat, ut mundo imperet , DEL-  
 PHINUS VIVAT : Hæc sunt tuo-  
 rum vota , Rex Christianissime , hæc  
 publicæ omnium , tibi , tuæque san-  
 guini fausta precantium acclama-  
 tiones . Det tibi Deus ætatem , quam  
 mereris , Delphino , quam cupis .  
 Illius ortu ita gaudemus , ut tuum  
 nunquam audire velimus interitum .  
 Vivat ille diu tibi , tu nobis semper .  
 Imperet in ævum , dum serò capeßat  
 imperium . Alios enim à te , LU-  
 DOVICE , Gallia Principes , alios  
 à te mundus , ANNA , Dominos  
 postulat ; quantumvis multos dede-  
 ritis pauci videbuntur , quia rarum  
 omne , quod optimum . Date filios ,  
 videatis nepotes , & talem senectu-  
 tem , quam sibi met optet pronepos ,  
 cernat in proavo ; tam fecundam  
 Borboniæ gentis seriem Gallia nu-  
 meret , quæ nullum finem habeat ,  
 orbem impleat universum .




F I N I S.



clesiam  
DEL.  
unt tuo.  
ne, ha  
ue san-  
clama.  
quam  
upis.  
tuum  
eritum.  
emper.  
apellat  
, LU.  
, alios  
ominos  
s dede  
rarum  
filios,  
ne cu  
nepos,  
undam  
lia nu  
abeat.







NAZ

R. BIBLIOTECA



R